



皇朝經世文編五集08

(清) 求是齋 輯

光緒二十八年 上海宜今室石印

皇朝經世文

編五集

時務分類文編卷十九

圖法

國家何以鑄錢曰以爲民也日用通行非此不便也今日何以停鑄曰以爲國也銅價過昂所得不償所費也然則有益無損有利無弊既可便民又不病國者莫自鑄金銀錢若矣古之時粟帛交易而止矣自首山采鑄九府通行炎漢五銖輕重適當泉刀貨幣之用縣歷四千餘年唐宋以運疆土益廣至明而後地丁稅課概用紋銀良由人利輕齎事趨簡便三品之輕重視九州之廣狹以爲差然紋銀折算零權衡輕重出入高下之際吏胥弄法市儈操奇銅錢則笨重煩雜不能及遠運千緡以行萬里所得者幾何矣今日萬國通商外國銀錢偏行於東南各省民情之所便卽天意之所開也歐洲諸國航海東來因商旅暢通途日遠銀錢猶有不便乃一律行用金錢自中國印度外貨幣交通概以黃金爲準因時制變雖聖王不能棄之矣其顯敝中國者莫甚於洋債一宗鑄價參差隱虧鉅萬而民間貨物一出一入低昂輕重均以金磅爲衡暗剝涓銷利源外溢國家所恃以宜民利用奔走一世者太阿之柄甘授之於外人薄海漏卮永無底止殆不得鋪張塗飾視若緩圖矣謂宜統飭各省設局購機將三品之金一律鑄錢行用其金錢銀錢之輕重及五分一角四開諸式畧仿泰西惟參酌情形熟權子母別定式樣詳議章程仍由戶部侍郎主持其事錢局薪俸及防弊諸端均參仿中西從其善者礦

政局開采所得就近平價采買以供鼓鑄之需仍與鈔法局相爲表裏互資挹注外合內分相繫相維立於不敗部庫舊司收解之款亦將銀兩折合金錢銀錢三者並收畧照時價年終奏定由部頒行各官廉俸既增則火耗陋規均可酌量裁減民生日厚國用益饒而天下吏胥衙蠹舞文軌法之端已剗削根株不去而自去矣夫三品厥貢夏書兩著其文天生五材以利民用今日之貧匱非食之不足實用之不充也中國全礦銅礦之多遠非秦西所及岱山開礦就地鑄錢免西人龍斷之虞有四海流通之利商務日振工藝日興再歷數十年中國之粟大豐亨有斷非海外小邦所能及者此自有之利自主之權乃怠惰因循守株待兔補苴掇拾剗肉補瘡他日財盡民窮偶有水旱偏災鋌而走險其事尙忍言哉迨天之未陰雨徼彼桑土糊糲爛戶維此下民孰敢侮予鴟鷂之詩人所爲拊心而歎也

交鈔

鈔法者所以濟金銀銅三品之窮也皮幣之端開於漢武沿於唐宋盛於金元逾變逾輕久而益敝明兩行之而敝

國朝一行之而亦敝者豈鈔法之果不可行哉信則行不信則不行有鈔本則可行無鈔本則決不可行也元明之末道皆因府庫空竭欲以洛陽貴紙盡籠海內之金錢立憲欺民而欲民之信之也得乎然則有國者何爲而必行鈔法也曰無他上下均便而已矣以國討言之歲入

一千萬之款而造千萬之鈔行之民間鈔本相均無流弊也而銀鈔兩行咸得

况父子會子四海通行轉運煩費之端可以盡免矣以民生言之交易往來現錢已多不便至攜行遠道則水火盜賊在在堪虞何若一紙輕賈取之如寄乎今日民間未嘗不行鈔也承平之世晉商滙兌獨擅利權自通商以來銀行偏設於海疆錢票廣行於內地或函或票與古人交鈔何殊惟國家自有之利權下散於商民漸移於外國耳龔自珍曰本朝行私鈔而不行官鈔他日必有巨商虧閉而四海為之搖動者閱數十載此言驗於阜康夫便總市閉則仍如前日度支充溢咸有虛餘則鈔法不行焉亦可也使如元明之季庫藏已竭鈔本難籌則雖欲行焉而有所不能也鈔法之當行而可行者此其時矣行之之法奈何宜於戶部別立鈔政府專派侍邸主持其事各省各埠設鈔政局所有辦法參仿滙豐銀行與商政團法兩局相為表裏此設官之法也由戶部綜計入款歲撥二百萬以五年為期京協各餉膏成滙解苟有擠軋庫款准其通融隨卽動還以清款目此提本之法也上下出入統以銀鈔各半為衡通行之鈔三品兼權一國至十國為度由鈔政府製造頒發參仿西法作偽無從憑兌之款照依滙費或函或票事後繳銷此用鈔之法也現有之滙豐銀行原可並行不悖公私權悉亦可相通惟分號分行煩厥補鈔政局費數百金以示急公之義此收權之法也滙豐銀行專辦貧民蓄積數元均可存放生利商民無不稱便必有抵押取息甚輕國家需用之時可以代籌巨款

照收薄息以示大公此種籌備之法也夫萬國通商而後其地廣矣其用宏矣不立妙法以濟其窮必有扞格而不通事滿而不便者此亦必然之理必至之情矣博致良規擇人而盡其薪俸嚴其勸懲至信至公通於中西通於上下斯惟商恤民之木足食足兵之原而新之原由振興民生國計之所以維持於不敝也聖人復起不能易已

鑄銀條陳

呈為敬陳管見仰懇據情代 奏事竊維夏書禹貢惟金三品三品者何金銀銅也周興以珠玉為上幣黃金為中幣刀布為下幣恐上幣太貴下幣太賤乃高下其中幣以制上下之用故曰黃金者用之量也蓋天下之財幣惟貴能制賤惟重能制輕非三品兼權不足濟生人之日用三代以前聖神相繼自黃帝以下莫盛於成周而文武當日理財實以黃金為準遂以車書一軌九譯來庭固由德化之覃敷亦制馭之得其道耳明初紋銀之貴與黃金等故俸餉地丁概以紋銀出入歲僅二百餘萬而民間仍用銅錢即以貴制賤以重制輕之義也萬厯以後美國銀礦大開運入中國本朝沿明舊制仍用紋銀年復一度支漸以不敷俸餉皆難自給上既病國下復病官病民何則紋銀之價日賤日輕不足以制物價之貴重也英吉利既得新舊金山自鑄金錢名之曰錢每鈔重二錢二分五釐持以與各國通商無能敵者蓋閩

合周法得貴賤重輕相制之道故能縱橫四海獨擅利權各國隱受其虧不能不謀自立美洲分國亦鑄金錢式與英等嗣而法效之矣德效之矣俄效之矣奧日意比效之矣今日本亦效之矣其與英鎊同者十之七八不同者十之二三蓋人貴我賤人重我輕必爲人制我貴人賤我重人輕必能制人人貴我亦貴人重我亦重則雖不能制人而亦可以自立此必然之理也各國制度不必仿英而不能不仿英之鑄錢者非有金錢一通商卽爲人所制也今各國皆有金錢而中國獨不用不鑄受害之鉅悉數難終約畧言之厥有四弊一曰國債中國前時所借洋債尙少然撥還期近鎊價必抬以十成計之輒虧至二三成以上今歲撥三十萬歲虧二成卽多出銀數百萬兩至於購破購船一切海防之費無一物不買錢卽無一事不受虧若自鑄金銀錢人之金銀之會以鎊遣鎊彼自無辭一也二曰商務通商各口買賣貨物均須以鎊合銀彼有千鎊之金錢卽可作萬金之貿易我輕而彼重卽彼富而我貧中國之匯號銀號典肆錢莊無不仰洋商之鼻息以金鎊易紋銀易以紋銀易金鎊難是彼以一金鎊奔走華洋華人已暗聽指揮相率入牢籠之內而平日出入虧累所不必言六十年來中國商務所以永無起色馴至今日海疆各埠無一富商卽偶有之亦必倚洋商通緩急者職此故也自鑄金錢通用金鎊彼此之勢始可持平一也

中國初開銀行以後將與洋行通往來乎抑不通往來乎如通往來必須金可通銀可通票亦可通方無窒礙否則買鈔賣鈔必致受虧亦與國債相等如不通往來其局面僅一匯票莊官錢局耳况國家萬一忽有急需豈能自堅其說則十日積之朝散之反聚斂中國之現銀以輸之外矣惟鑄用金銀錢銀行鈔票亦以金銀錢爲數則四通八達若網在綱三也中國既開金礦又不禁金出洋是爲投人利器既不鑄金錢又不用金鈔是爲自窒來源今日銀賤於金三十餘倍銅錢賤於金錢一萬餘倍他日將金收盡低昂其價值以盤算中國之銀則中國銀根立時短絀市面立見動搖生人養命之源應於人手其能御賤重能御輕而輕斷不能御重賤斷不能御貴此一定之理雖聖王復起無可如何也惟鑄用金銀錢則大局挽回在此一舉四也或曰中國官民上下所通用者銀耳只須銀多何患金少此在通商以前可也通商以後則不可此後不通商可也此後仍通商則不可何以言之今綜計天下釐金關稅鹽課稅出於內地之商者約二十餘萬兩歲有所增是海疆之貿易已與內地相等內地稅出於海疆各商者亦二千餘萬兩歲有所增是海疆之貿易已與內地相等內地可以銀計海口必以鈔計內地之現銀少海口之現銀多頻年海溢川流彼已將利權操之掌握此後金銀價值高下由人尚能保此銀之長在中國乎惟金銀並用乃

可輕重相權且金錢輕便所值較多人可收藏一二文以防不測是鑄用金錢即藏富於民之上策也或又曰中國金礦甫開奈黃金不敷鼓鑄何而無慮也各國之鑄錢者非皆自有金礦也按時價購金鑄錢已能敷用況中國從古至今稱黃金最多之國只須廣開金礦並由銀行金店按市價買金斷無不足現在情形可考而知者海關出口黃金之數歲值銀三千七百萬兩計重一百餘萬兩按照英鎊之重可鑄金錢七百萬元波河一處出金歲亦在十萬兩內外此外吉林奉天四川雲南等處歲歲增多外國鑄錢之機皆金銀並鑄惟鋼模不同金重於銀一倍金錢雖小而分兩轉多也故金多則鑄金錢金少則鑄銀錢從無停機待鑄之患總之鑄金錢所以禦外鑄銀錢所以安內多鑄一金錢即外國免一分盤剝多鑄一銀錢即內地免一分拮据而以貴賤輕重之理及現在情勢言之則鑄銀錢猶緩而鑄金錢乃彌急也請言自鑄金錢之利天下各國所用之金惟中國赤金係十足色標金則九八也各國所用器飾貨幣之金自六成至九六而止無能及標金者因鍊金無須化學愈銀愈純故中國獨居上上耳各國鑄錢之金大畧以八四為率因成色低則行用不便成色高則資本太多當日英鎊通行即係八四他國仿英而鑄亦以八四為衡本不必十足成色也匯豐馬加利等銀行專做中國金銀交易運金出口並無稅釐以

彼八四之金錢抵我十成之金價是每金百萬兩顯虧十六萬兩矣今我取以鑄錢則每金百萬兩即可淨贏十六萬兩合紋銀五百萬兩其利之大如此故鑄銅錢僅敷成本而已鑄銀錢爲國大利鑄金錢則大利之尤此項利源理宜歸國並應奏定程式頒行以重其事則源源運鑄美利開矣通商通外國金鎊金錢之利英鎊盛行而後各國相率鑄錢此國之金錢不得通行於彼國出入虧折仍屬不便於民惟中國自道光以來外國之銀錢銷流於海疆內地中國行所無事亦竟無弊端蓋天下之錢本供天下人之用天無私覆地無私載日月無私照則錢幣之流行天壤者亦然此天下之公義也銀錢如此金錢可知今自鑄金銀錢而外國之金銀錢與中國分兩成色相同者均准通用則彼錢皆我錢也在我振興商務以貨易之而已夫天下萬事萬物各有一至當不易之道無中外古今一也自開關以來五千餘年天下鑄錢之多莫多於今日者各國錢法之亂亦莫亂於今日者而有不多不亂者存於何驗之驗於天下人之便不便而已矣便不便於何驗之驗於通行之廣不廣而已矣今英國之金鎊通行已徧地球美國墨西哥廣洋所行亦占地球之大半粵鄂仿鑄分兩相同得其要矣中國銅錢雖僅行本國而以御小物畸零分算大益民生此三者皆天下之至便貴賤輕重適得其權衡度量之所宜然固圖法中至當不

易之大道也。然天道後起者勝。利弊之故。忍久而始明。中國當此之時。會逢其適。實富貧強弱之一大轉機。天佑國家。時不可失。應請宸斷毅然釐定。圖法飭下。英美出使大臣。購買鼓鑄金銀錢機器一副。來京。即於京師設立錢局。機器之大小。以每月能鑄金錢百萬。元銀錢三百萬元為度。明降諭旨。定圖法為三品。金錢為上品。成色輕重同英鏡。而龍文款式如銀錢。每金錢一枚。權紋銀七兩。銀錢十枚。銅錢十千。外國金鎊金錢。與中國分兩成色相同者。亦准通用。銀錢為中品。成色分兩款式。均照粵鄂奏定之章。每銀錢一枚。權紋銀七錢。銅錢一千五百小銀錢二枚。二角小銀錢五枚。一角小銀錢十枚。五分小銀錢二十枚。外國銀錢與中國分兩成色相同者。均准通用。銅錢為下品。各省照舊鼓鑄。輕重以七分為率。適數其成本而止。出入一律。概以錢鈔各半為衡。明定火耗公費章程。由內外官吏自行酌定。請旨遵行。以資津貼。佈告中外。咸使聞知。嗣後有阻撓圖法。挑剔留難者。以違旨論。京師錢局及粵鄂各省鑄銀錢局。並請皇上準今酌古。賞錫嘉名。以著一朝濟變之運。開萬世同文之軌。提綱挈領。操矩持衡。萬化之原。權輿於此。伊古以來。安有堂堂大國。億萬人民。而日鏹鏹然。慮寡慮貧者。徒以鈔幣未定。民用不敷。物重錢輕。致成倍貶。以自鑄金錢。立其本。以參用鈔票。暢其流。以廣鑄銀錢銅錢。宏其用。以開礦

行

務農通商惠工諸事收其利而保其權若網在綱如金受鑄造師夏后繙美周京然而不強不富者未之有也管蠡之見是否有當伏乞鑒情代 表請 旨施行無任悚惶激切待命之至。

製造局開鑄制錢論

在昔承平之時各直省俱設有寶泉寶源等局專事鼓鑄制錢厥因內地所產之銅不敷鑄造逐漸歉乏運光咸豐之際惟京師之寶泉局及蘇省之寶泉局二處尙未停鑄實是時天下精華皆萃於江蘇一省富商大賈聚處於吳中財賦之雄中於他郡故所造制錢皆取給於蘇局而銅質則借資於日本設立銅局兩處一為承慶局係官督而商辦有號官局一為嘉惠局係民團集資自辦有號民局皆履有帆船數艘專往來日本各口採運銅斤初時獲利頗厚自粵匪擾蘇後兩局遂被燬無踪寶源局亦不復開設而蘇省鑄錢之事亦廢爾有新出之錢皆京師寶源局所鑄者銅質最劣而出數亦稀定例 新天子登極祀元必頒發制錢於各直省歷屆慶同治光緒三朝四十餘年間朝野多故時局艱難錢幣之鑄不能充裕而舊時所鑄之錢自乾嘉以上銅質精好無倫內地銅產既絕銅值驟昂奸商巧於漁利輒私鑄制錢以為器皿甚且謂漢銅所鑄之錢銅質中含有白銀以而法化學象之在錢可得銀數厘相率販運出口內地泉源暴竭至近數年而益不能支推其致竭之由厥有數端一則因鼓鑄久停新錢絕少增添一則因採銅不易銅價昂事煥改一則因舊制大精奸商取以鉛鍊一則因錢價陡增市儈壟斷居奇今

誠欲剔除凶弊自以鼓鑄為第一要義然開其源者仍當節其流況當經費支絀之時所出諒亦無多倘鑄者自鑄而煨者自煨則漏卮終無可塞之時此關道憲所以一面稟請開鑄一面即諭屬嚴禁私煨誠哉其思慮周匝關心民瘼矣然以意度之本埠為通商總匯之地市面較他處為盛錢糧當亦較他處為鬆乃自上年至今錢串兌換反短於他處者其故何也良以各業中成本素裕之家輒將逐日所收之現錢屯積不出以待善價如南北貨店官醬園等類不都開有地產多者十餘萬貫少者數萬貫數千貫合之便成大宗市面愈緊則物稀為貴最少者並數十貫而藏以待價宜錢串之終不能長也且浦江中船隻往來如梭多於過江之鯽每客夾帶十餘貫船之小者可分帶數百貫而不露痕迹大者即數萬貫亦可深藏雖嚴申厲禁而每日出口者仍不可以數計如此則錢荒安可救乎又聞浦左荒僻之處每夜設有鑪竈專鑄私錢及消煨制錢等類附近居民每於深夜輒見田中火光燭天迨夫明則杳無形迹是欲救本埠錢荒者除開鑪鼓鑄查禁私煨之外尙當設法使奸商不敢屯積不敢販運出口而鄉僻處之爐竈尤須審飭汛捕協力訪拿務使該匪等無地可容而後已聞蘇省因錢根緊急官中鑄鈔以濟其窮而市肆狡獪之徒將鈔指匿不放錢緊仍不見鬆最方伯諭各當舖趕鑲錢毒以奪其利各商始懼而加長此實泉益之深算能挽回積弊於無形者劉觀察既存補救之心將為滬上居民廣利源而甦生機則之數事者皆足以助仁政之施措且為閩邑士民所同聲禱祝者也至以製造局為鼓鑄之所則既省工程又資便捷機匠既皆熟手爐屨又皆現成但能廣籌經費得抹五金則既鑄制錢以濟目前之急將來大

小銀圓皆可因此擴充由銀而金即先零亦可試造蒸蒸日上之機會於是發軔馬觀察誠今之樞人哉

論金銀漲落之由

近時美國金幣支絀銀幣遂至低落行情幾無底止橫濱正金銀行理事高橋某推論其理曰美國金幣支絀銀幣低落之原實因該國主金黨欲牽制主銀黨之勢力故爲是權術以挫抑之也美國將屆選舉民主之期昔日共和合衆二黨又分爲主金主銀二黨主銀黨之氣焰甚熾幾有鼓動輿情之勢以人數多寡計之主金黨固在下風然主銀黨中類皆中下等之人名望不甚隆智識不甚饒貲產亦不甚厚時不免有粗陋之徒辭氣鄙倍較之主金黨以東部諸州爲中堅貲財饒多名望知義並高固非同日論矣主銀黨以西部諸州爲根據其壟斷銀幣全賴該地方銀行爲接濟而該銀行等貲財多薄又實仰給於東部諸州之銀行東部諸州積金家習知其故意欲抑制主銀黨之勢力使彼等知鑄造銀幣之不得暢行故遂將借給於西部諸銀行之本貲銳意收回西部諸銀行被其逼索自非收回所借出之貲財幾不知所措由是主銀黨大爲所窘別無週轉之法且併其所壟斷蓄積之銀幣亦不得不由價以求銷路此銀幣市場所由敗壞也且東部地方積金之家知九月間爲美國輸出農產物之期將來輸出之貨必超於輸進之上故此時姑防止金幣之流

出不久而出貨既多自見金幣之流進故不以金幣支絀爲懼也惟因防止金幣流出之故金幣利息遂陡增查最近電音云英美間之匯票行情四元八十五仙二分之一按英美間現劃貨幣之法四元九十仙爲自美國現劃金幣於歐洲之數又四元八十四仙二分之一則爲歐洲現劃金幣於美國之數若按今日之匯票行情而論之歐洲金幣之權利殆幾爲所把持矣由此以觀卽知今日銀幣低落皆主金黨所爲冀以抑制主銀黨而自伸其用金之權也按以上所論雖皆推測之詞然頗得其梗概大約銀幣行情之低落尙未有已時矣

日本東京古城貞吉譯

麥貝尼氏幣制論

美國共和黨候補總統麥貝尼氏致貨幣制度直據已見移書於黨員其畧曰我國貨幣制度自千八百六十八年以後縣延至今復見其紛綸矣蓋貨幣一端關財政之隆替道國者亟當留意也彼合眾黨及主銀黨等欲以金一銀十六比例舉行鑄造銀貨之制已不能著實切施其制度之壞固無論矣倘政府堅持此論定使財利社會及產業社會不勝惶惶觀商賈之震盪聽謠喙之繽紛可以窺其涯畧矣在合眾黨有識之士恐國家聲威自茲失墜民人福祉末由保全故肯實論糾合同志

以抗自鑄銀幣以銀塊交國家造幣局代鑄成幣局即給還之謂之自鑄之議也抑貨幣者或比較所有物品之價值或計量交換品物之數目或核算外國交易之差等懸遷之際最審慎焉若從主銀黨之說自鑄銀幣而靳其勞費則委辦無人亦不能自收銀幣也卽一二礦家及銀主被其利益而此外之人束手旁觀焉耳是美國之造幣局反爲一二礦家及銀主而設也嗚呼邪說興而正論微矣夫自鑄銀幣不能紓勞工行路之難也不能減勞工服勤之苦也不能增勞工賤役之價也不能助農家收穫之利也不能創設工場而代謀生計也不能經營新業而同享樂利也噫莊生所謂使人憂使人悲之道也烏可行哉要之自鑄銀幣之議雖以銀定價值之標準然銀之價值於別樣商務無所補益又不能維持一切諸物之價值也則惟有敗壞決裂不可收拾而已況言而不行卽行而鮮當其失信於商業社會已多矣昔合衆黨決議於芝加哥大會曰現有五十三仙市價不論何人有携一元銀塊請美國造幣局可易鑄造銀幣一元以此銀幣爲法幣卽國家制法立爲貨幣也故於公私一切之行使無礙也誠如此說則有銀塊者可坐擁厚資而收其益自餘貧民無毫末之利也何則無銀塊者欲得貨財而無由遂不肯出勞力以換之矣據現時市價一元銀塊值五十三仙故有銀塊者得五十三仙銀換一元卽百無銀塊者皆以昔值五十三仙銀塊爲當一元則國

家鑄造銀幣故有損而無益矣若行銀幣使上下失利是國與民均兩損也謂自鑄銀幣必有利益吾不信也按我國千八百七十八年以來所鑄造銀元總計四億元有餘此等銀幣現爲法幣故公私一切通用也然將來自鑄銀幣其重量模形國家印記雖與現所行之銀幣同然其價值則必大異何也蓋邇來行使銀幣者皆國家鑄造不許有一毫私利於其間乃能保全銀幣也其定法制按當時市價收買銀塊以鑄銀元國家掌握造幣之權相度時宜鑄造貨幣以保持金銀幣之平衡而不敢私利私益增減鑄造額數也然銀塊市價與銀幣定明價值國家法定價值者之差則民有利益而國無虧缺也蓋銀塊市價常賤於銀貨所定之價值故此中所獲利益實非淺鮮國家以鑄造貨幣支還國債有無互通便可風行於境內則其所定價值必無礙也國中既以此等銀幣爲法幣使市僧交易流通宜與本位金幣價值均同乃不使有銀幣者與折閱之歎是從道德中有此義舉實由法律上行此義舉也蓋法制積久有法條者相沿以至於今也足見自鑄銀幣決不能與上所述之銀幣同一概視也假令同其形式其價值亦難比今存之銀幣也何者曰若如自由鑄造黨之說則國家除鑄銀塊爲銀元外無關於造幣之務而鑄造利益絕無所得既發幣而不任其責矣必經營鑄幣通行之務乎故維持銀幣當準人民自鑄之例而國家

代肩其任道鑄幣已成鄭重交付之而已既交付之則造幣之責亦畢矣是主銀論

者之大旨終使美國爲銀本位國而已以銀爲本位貨幣果爾則自鑄銀幣者決不

能維持銀幣之價值也王銀論者雖欲以值五十三仙銀爲百仙法幣而謂能保銀

幣與金幣同價乎恐不副所望矣不獨於理爲然即古今萬國之實例亦相同也故

自鑄銀幣之終極也勢必制幣通行之制幣之價值賤落始足當銀塊市價耳況市

價低昂原無定律一浮一沈不見常形則自由鑄幣之爲害於財政貽禍於商業昭

昭明矣如斯政策吾安得不厭排之哉若美國復行金銀同一本位制以金銀同一恐

不可得矣當金一銀十六比例之時美國欲公開造局以金一銀十六比例鑄造銀

幣奈地球銀多紛紛騰集何諒復行本位之制亦不能久也墨西哥及中國以用此

策而失計彼墨西哥公開造幣局以金一銀十六有半比例行自鑄幣之制意欲任

人自鑄金銀兩幣也然求鑄金幣者頗覺寥寥而國內金幣流出海外絕無形影究

其實情何異單以銀爲本位之制乎以銀單爲本位貨之制也故欲強行此制非得列國共行則

美國不如仍守金本位之故轍也且夫金幣者固地球大商所等視以爲本位貨幣

也況貿易中關繫我美者多以金幣爲本位制乎試觀千八百九十五年外國貿易

以金爲本位者十分之八自餘亦以金爲本互相貿易抑美國一千八百七十八年

立法發行銀幣及代用銀幣六億二千四百萬元以通行國內其意蓋欲使銀幣與銀塊價值畫一而併用金銀貨幣也。美自建國以來八十九年凡所鑄銀幣約九百萬元。旋於此年設法任便暢行銀幣亦不礙財政又能與金幣保同價值故毅然舉行之也。今國內行銀幣數致出於金幣之上然其所以至此亦屢經試驗耳。美人夏望之法實出此時其法因時價購美國所產銀塊以鑄貨幣也。自千八百九十年至九十三年國家收買銀塊每月四百五十萬翁士。一翁士當日本八目二分九釐餘以一年合算實五千四百萬翁士也是居地球產銀總額三分之一也。當時自由鑄幣論者謂國家多收銀塊定使銀塊銀幣同價值也。然未數月銀塊價落始出論者意料之外。故總統苦爾苦倫得勸告朝野兩政黨遂禁夏望購銀幣之法由是觀之可知自由鑄幣必不能增銀塊價值矣。前車可鑒豈宜仍蹈覆轍哉。余以一千八百九十一年臨公開演說會嘗論若行自鑄銀幣必當萬國訂約以羈束之。我共和黨未嘗詆行使銀幣也。至今亦以爲然。現美國銀幣之數比較外國除印度中國外實居他國之上。即比英國多五億元比法國多一億五千元比德國多四億元比印度多三億二千五百萬元比中國多三億二千五百萬元。我共和黨欲與列國訂約若余得樸總統應即切實施行。今美行自鑄幣制列國聞之必傳我爲褻本位制矣。恐不利也。故當與

列國訂約爲之限制維持現時之貨幣本位斯爲上策意者美國以金一銀十六比
例行自由鑄幣之制必不利於用幣乎現金幣五億元於貿易市場所失已多我共
和黨不欲排除金貨者也我黨宗旨伏願國家立金銀兩幣同價值之善約使現在
銀幣永與金幣均價此實我黨千八百七十八年以來之政策前後一揆未嘗變易
也又欲使美國所行銀幣及紙幣一切與金幣同據既往施行之跡將來金銀兩幣
可保同價也不然以金一銀十六比例行自鑄幣之制則美勢必爲銀本位之國無
待贅述矣竊爲二三君子不取也

論美國選舉總統

野木生來稿曰美國選舉總統之期在二旬間耳今合眾共和兩黨虛實互策馳驅
環瀛勝敗之數頗難逆億然關係我國原非淺鮮也若麥見尼氏中選定加抽關稅
果爾則我國繭絲茶絹織物及其餘雜貨均被其害馴至杜絕輸出之途亦難預料
倘墨來耶氏中選定行金銀兩本位制度其波及我國者勢必擾亂商務社會也要
之二氏中選均不利我國惟望免罹其禍而已

今麥氏聲名赫濯焜耀當途一旦中選必持加稅之說踵千八百九十年遺法保護
農工商業以禁列國輸進品物也說見廿八卷美國共和黨宜論新政篇行此下策可謂愚矣雖微渺

商務稍裨毫末試問貧賤平民豈能購貴物乎何異置美人於柱桔也是徒滋物議而已果高其關稅遂能杜絕外商乎恐鄰國未必降心相從也故司亞氏憂憤填膺嘗移書於泰晤士報云行此關稅是野蠻之國也麥氏素志能行與否尚未可定若實舉行當告美國代議院及元老院協力贊助陳說利害無庸低首下心貌為退讓也設麥氏持議稍涉鳴謙烏能力排眾論主張銀幣哉然在黨負有不可其說者若布告議院則事理易明列國果諾其關稅否無從揣度至麥氏欲行其說則當先排此二難也此野蠻政治文明之國豈忍為耶

麥氏素不悉幣制嘗主持通用銀幣及自鑄銀幣之議矣蓋麥氏本以銀幣為可者也司亞盟氏云彼即麥氏也嘗駁總統克里末難多氏主張金本位說矣然中心好之而

口不欲言自為候補總統纔月餘耳無日不演其說至於金字未嘗道及也取行違

言語囁嚅蘊蔕之狀形容如繪墨來耶氏亦比麥氏難為伯仲彼麥氏非不解幣制

者特冀行其說而覬覦總統耳蓋麥氏一滑稽之流口若懸河辯才無礙籠絡黔首

收拾人心美國士夫罕其儔匹以無名之府民掉三寸舌一出而震驚新大陸指美州也

使彼非熱喘狂奔傀儡曉舌安能臬宰朝野哉麥氏謂變金一銀三十二比例為金

一銀十六比例是豈人力所能變耶夫初理理財者猶悉此中利弊乃持不通之論

而隨聲附和實繁有徒。氓之蚩蚩，殊難索解也。倘列國龜勉同心，共商平準，則墨氏金銀兩本位果能實行乎？列國平準，雖屬未定，意者諒有同情耳。凡生財大道，在金銀時價之比例。此有所需，則彼有所給，必盈虛倚伏，而後變軌法律，尙不能制。何有於人力乎？日本西字提報論云：余不服美國主銀黨之識見也久矣。不揣其本，徒事紛更，社會商業，又費杞憂。何墨氏之輕舉妄動，一至於此也。桑港報曰：若彼說實行，則銀價騰貴，而金價賤落，使行金幣者絕跡，而銀幣定泛濫市場。當此之時，美真爲銀本位國矣。然美國人民，欲爲金銀幣兩本位者也。若一旦權衡事理，思墨氏之失計，將昔之如蠶附羶者，今必倒戈解體矣。墨氏知之，故巧爲趨避，以曲伸其說。噫，環球財政，盛衰之機，期僅決於旬日。以西十一月三日爲期不識中原之鹿，果落在誰手也。

容觀察閱請創辦銀行章程

銀行總綱四條

一、開辦事權 銀行昉自泰西，英法諸國，屢經改章，愈變愈精。要以美國爲最善。日本銀行亦多採之。今擬參倣美國銀行章程，先設總銀行於京都，續設分銀行於各省城及通商口岸。總銀行資本以一千萬元爲額，統由戶部籌撥。欽派大臣督辦，并專派大員總辦。分銀行即由督辦總辦陸續招商集股，擇地開設。所有總

行分行一切應辦事宜隨時擬定咨明戶部辦理

一印發券票 泰西有國債券無論數千百萬皆由銀行籌今息借商民之財而給以憑據名爲借券銀元通行市面而代以紙幣名爲銀票此兩種均由總銀行用機器製造或暫時先往外洋定造借券年息五釐以備各分行繳銀領券凡有商民購買亦可照領銀票照資本定額如以一千萬元爲本應提六成六百萬元存庫此六百萬元中又以八成製爲銀票計四百八十萬元票內載明有庫款存抵本多票少隨時兌現與空出紙幣者不同自無折閱之慮通行各省可抵錢糧繳歸藩庫即可作京餉起解開辦之後京外流通資本愈厚即照章加發銀票該票之銅模定鑿紙張定造經數十手而成正面華文背面西文花紋工細斷難仿冒仍由戶部編號加戳然後通行每月已未發各若干詳註冊簿發出銀票或日久破損准換新票所繳舊票點明號數對眾銷毀

一擴充分行 總行既撥官款分行應招商股京都繁盛可設分行數處各省會暨通商大埠如上海等處次第招商開設泰西因領用券票稱爲國家銀行今請設立牌號稱爲某某官銀行如集股十萬元應先繳銀三萬元給與借券如繳銀之數股本多則借券遞加總合股本三分之一爲度此項借券於各處官銀行開市

時仍繳存總銀行掣給憑單每年給與年息五釐核照所繳借券之多寡減成另領銀票所減成數又以股本多寡酌定等差股本五十萬以下者照所繳借券領銀票九成五十萬以上者八成百萬以上者七五成三百萬以上者六成如此則股本愈多而所領銀票之成數愈減此項銀票需用若干係於總銀行額設四百八十萬元銀票之外另行隨時印造萬一分行虧折已有存總行之借券抵保且爲數多於銀票除抵償外尙有餘款以備派員查帳等用再有盈餘仍給還各股商並照西例凡銀票存項股本每年正月七月收稅兩次每次通稅銀票已用出者收稅五毫存項一毫半股本二毫半合併一釐兩次共計一釐收稅極微與生意無礙其餘未領借券之票號錢莊如有願改官銀行者亦准繳銀領券一律辦理其牌號悉聽照舊無庸更易

一兼管鑄造 現在銅錢日少而金銀兩品尤闕擬由京都總銀行鑄造金銀錢近日金錢一項外洋交涉漸多其分兩成色務與西式一律庶中外通行不致因金價九零而折閱審是則需金日多金礦宜盡力開採土法淘洗所得無幾宜聘礦師購機器廣開以期迅速所出之金統運京都鑄錢不得私售出洋以杜漏卮此中收回利權不少若礦金不敷鼓鑄自可稍待機宜且先鑄銀元以便民用現查

各省官局已鑄銀錢其成色高低務宜一律設有參差關係甚大請飭將各省新鑄式樣送總銀行查驗其每年共鑄若干數目亦須咨報以憑稽核

總行章程十二條

一總銀行代戶部籌款本與分行專做生意者不同惟創辦之始分行尚未編設擬請暫收官商存項並匯劃支付等款以爲商辦分行之倡經理一切尤在得人應由總辦招請美國熟手分司其事詳核收支以免遺泄而昭大信漸與各國著名銀行聯絡以期匯劃可通緩急可恃款歸實際人無虛設所有員司概不徇情濫用

一總銀行自總辦以次薪水以及公用應准作正開銷暫在所撥資本內支付俟銀票通行鑄錢獲利後自應專撥幾成以備行用一切款目每月結報一次每年綜核一次刻成總冊編發各省分行並詳報戶部備案總銀行冊簿戶部堂司可以隨時閱看

一所撥資本一千萬元除六百萬元存庫外尚餘四百萬元預備購地建屋造庫棧器鋼模紙張并鑄造金銀等用奉准之後請先撥若干以便布置一切

一鑄造金銀需費較鉅如資本不敷周轉應請設法籌撥轉輸甚捷不致久關成本以後戶部應放款餉如以金銀錢及銀票爲便即可酌量搭放若創辦之始市價

未平或有漲落等情再行斟酌辦理以期盡善。

一 新開金礦或統歸官辦或招商集股商股應得之金擬請按照時價給以鑄出之金錢以免金砂入金塊轉售出洋此中仍恐難免偷漏須飭經辦之人隨時稽查結報總行有稽查分行之責買空賣空自當嚴禁如各行有違例情事可派委員至該行查帳如有應改應添或應撤之事稟請核辦費用開銷公款如派出之員有滋擾勒索等事准分行詳報立時撤去。

一 總行所收藏鐵櫃之借券以及各項鋼模每年須由戶部會同查看一次有無損壞走漏登明簿冊其已停辦之銀行所用銀票鋼模隨時驗明銷毀

一 所發借券除官銀行照領外其餘紳商士庶均可購買應付年息五釐無論何處官銀行一律驗票照付所付之銀由官銀行報明總銀行提款劃還


一 所收借券現銀實與息借商款無異因有銀行付息較易取信俟集成巨款後可用以整頓海陸兩軍及一切保護疆土振興商務之事

一 泰西借券名目不一用作何項工程者即名爲何項借券或二十年或三十年券內載明年限但使年息照付其信皆字限滿之後仍可展期若干年換給新券

一 鐵路招商創議已久祇准華商承辦不許暗招洋股且路長款少勢難編築惟總

銀行及分行開設之後借券暢行可另發鐵路借券每張銀元至五百元或一千元商民因銀行之可恃而深信國家必有羣相購買者蓋國鐵路不難同時並築矣

借券圖式



上層本票下層分別小票每半年付息兩次每次去一銀計四十五小票二十年滿期

一借券之式大約長方尺餘上列本票下列方寸小票四十張即息票也到期持向銀行剪去一票即可收息再到期再剪每年付息兩次剪盡小票則年限已滿可持本票收本其法甚善其製甚精茲謹繪圖式於左

分行章程二十四條

一分設官銀行之牌號住址及董事幾人集股若干每人有股若干每股先收若干應設立合同簿册刻用圖記開報總銀行轉詳戶部給與准關執照并稟請本省藩司暨地方官立案以憑查考

一官銀行如集股十萬元應俟開辦獲利後逐漸提存公積銀至二萬元為止作為餘本萬一股本虧折除將餘本儘數分償外不更追查各股商私財此為有限公司庶股商不致受累

一開設之日照西例先定限二十年如無違例之事准其再開如未滿年限查有違例之事即令停辦或三分有二之股商不願再開亦可隨時會議停辦

一股商所買股份即係自己產業如欲轉售於人可至本行報明於簿册內改換新股商姓名住址如未報明改換倘有應問股商之事仍惟舊股商是問

一股商公舉董事至少五人董事中再推某為總董某為副董某為本行總理均須

有股分稍多之人。至僱用司帳等人。須取的保定賞罰。凡收買匯票。期票。以及代存銀兩。抵押款項。應由總理主政。

一 取本收進一半。即可稟請開辦。未收股本。分期續收。如有股商或者肢公辦事之人。於續收股本。到期不付。即出傳單聲明轉售。倘無人願買。則該股已付之本。准於六箇月內。由董事會議定奪。倘因此而資本不足。即行查帳停辦。

一 如欲推廣生意。加添資本。或三分有二之股商。欲減少資本。均須詳報總銀行批准。以便核定借券之多少。照例增減。

一 每年正月七月。由公舉董事。聚議行務。董事任事之期。一年為限。如眾議僉同。亦可接任。每股商按股之多少。派議事單若干紙。備書是否字樣。如不能親到。可託他股商代議。而行中執事。不與焉。至股商有欠行中款項者。不准會議。

一 錢莊票號。資本充足。可以改官銀行者。不必另換牌號。如有數家合併一行者。牌號聽其自定。均須將資本若干。報明總銀行。照定章核辦。

一 每六箇月。董事查核除開銷外。淨利若干。每股派息若干。所獲淨利。當先提百分之十。劃入下屆帳內。為公積銀。一俟公積與股本核算至二十成之數。乃止不提。一 銀行借與一公司。一商家。或一人之款項。期限以六箇月為定。如欲展期。須董事

議准其銀數不得過收進股本百分之十至收買期匯各票抵押生意不在此例
一 銀行股分票不准在本行抵押本行資本不得移作各項工業字號如股商挂欠
本行銀款過期不還可將其股分撤回准六箇月內售出或當眾拍賣歸款否則
總銀行可查帳勒停

一 銀行所領銀票原為隨時行用不准抵押現銀作為增添股本亦不准將原定股
本抽出以銀票充作股本

一 各銀行應於每年正月七月間十日之內開明上屆用出銀票收進存項除存部
借券外所有股本通址計算每項若干由首董帳房等簽字呈繳總銀行備查如
有不開報者議罰若干元在應付借券息內扣除

一 官銀行所領銀票如有水火不測准由該銀行呈出實據具結請總銀行換給新
票補足所失之數

一 官銀行所領銀票雖有繳存之借券抵保而本銀行內仍須存現銀二十五成謂
出銀票所收存項兩款合
算百分中之二十五成以備兌現俾無缺乏之虞

一 外省各官銀行應於所備現銀二十五成之內酌提若干有放京都總銀行總銀
行將此銀另款存儲不營運不算息以備各省官銀行到京可以兌現總銀行收

銀之後給與各省官銀行收條官銀行將此收條亦可作爲本行存銀額數總期
京外銀票流通以昭大信。

一各處官銀行所領銀票准用以輸納地丁錢糧釐金鹽課等款。一如現銀不折不
扣惟進出口關稅仍用現銀。

一京外各處官款餉項如有可以交銀行存放者即就近發交。息應解京餉協餉
亦可飭該行滙解以歸簡易。

一銀行於借款拆息期滙各票應收息銀須照各處市面常例議定不得逾額如有
違例取息過重應將存總銀行之借券息罰去並准人控告飭令償還。

一銀行不得收買地基除建造本行房屋及分行房屋地基外設有因欠項抵押或
被欠無著作爲歸款之地基暫時執掌即須售去不得過兩年半期限凡抵押地
基房產亦須產價多於抵款一倍以昭慎重。

一銀行銀票如有持向該行兌現而不照付者准持銀票之人控告由總銀行查明
確實議罰或收管該銀行資本簿據并代理各帳。

一銀行停辦後應將所存現銀繳歸總銀行以備代付用出銀票之數總行收票付
現之後即將該行牌號銀票銷毀不再用出其前繳抵保銀票之借券可仍發還

聽其作何開支

一銀行自欲停辦，潛將期匯各票抵押產據，易換他人名姓，以圖巧避，查出從重議罰。

容觀察閱續擬銀行條陳

一總行自總辦以次，薪水從優，俾得自給，除應領薪水之外，不得絲毫沾染，行內帳目，由熟悉銀行規例之西人經管，其帳簿任人觀看，逐日給算，極易稽查，在西人本多公正，萬一查出稍有蒙混，卽行更換，不得以訂立合同數年，曲爲徇庇，總辦知情容隱，應請卽行撤參。

一總辦布置銀行告成，或另有要差，或陳情告退，或朝廷另簡賢員，卽可隨時接辦，簿冊具在，交代甚易，並無久據要缺，難於更換之弊，但期接手之員，於行中規例，循照舊章，不可任意紛更，致歸咎於創辦之不善。

一貲本一千萬元，先領若干元，合銀若干兩，應請如數領足，一切部費、飯食等銀，概行禁絕，蓋總行猶戶部之外庫，應視爲本部應辦之事，不可以尋常領款論，庶一書役人等，稍有需索，應請剴切曉諭，嚴行禁約，倘領款轉轉，惟有據實稟陳，斷未便委曲含忍，致啟營私之弊。

一建造總行房屋務須寬敞堅固擇地在戶部左近距南面不遠之處購買民地
圖定造應需料件工價無論購自外洋或在中國採買將來報銷須將原購發票
呈驗一面由戶部密行訪察有無折扣浮開如有弊端惟總辦是問

一鑄造金錢最易欺人疑慮查金錢成色有定化學師在行查驗無纖毫之誤自鎔
金房以至驗收房經十餘處之手始克告成剪餘之金邊地面之金屑皆有極妙
之法拾取無遺工匠人等不能竊取絲毫成色幾何盈餘幾何費用幾何皆可按
籍而稽無庸慮銀銅兩項亦照此辦理

一事權貴一前已首先陳明惟薦引員司人情不免倘不能錄用或已經錄用而辭
出最易觸同人之怒馴至誹謗叢生事事棘手今創辦銀行務期裨益國家如
果有才雖重聘不惜如其無能雖力薦不受萬勿以私情而轉忘公義以上謹舉
防弊大槓此外言之難盡總在遇事認真破除積習無論派委何人總辦皆當如
此奉行據實再陳伏祈俯察不勝幸甚

戶部議 奏各省攤派籌還洋款摺並附片

戶部謹 奏為常年應還俄法英德兩項借款數巨期促亟應預籌辦法以免臨時
貽誤恭摺仰祈 聖鑒事竊查近時新增歲出之款首以俄法英德兩項借款為

大宗俄法借款計一年共應還本息二千一百十五萬四千七百五十二佛郎現在佛郎合銀時價核算約需銀五百餘萬兩一年分二期付還一期還息約需銀一百八十九萬兩一期還本并息約需銀二百一十萬兩皆半年爲一期英德借款計一年共還本息九十六萬六千九百五十二磅照現在金磅時價核算約需銀六百數十萬兩一年分十二期付還每期還本并息約需銀五十餘萬兩皆一月爲期二者歲共需銀一千二百萬兩上下益以所借羅豐克薩及華商等款本息并袁世凱宋慶董福祥魏光燾等軍餉乾則歲增出款已不下二千萬兩 國家財賦出入皆有常經欲開源而源不能驟開欲節流而流亦不能驟節其將何以應之此非各省關與臣部分任其難不可查匯豐克薩及華商等款本息并袁世凱等軍餉乾與俄法英德二款本息同關緊要而俄法英德二款爲數甚鉅爲期尤促若不預爲籌定則一月一付之五十萬兩轉瞬即臨卽半年一付之一百八十九萬或三百一二十萬兩亦非尅期能辦 臣等晝夜焦思萬不得已計惟有先將俄法英德二款本息由臣部庫與各省及各海關分別認還庶幾綽足集事擬以每年應還俄法英德二款作爲一千二百萬計算先儘部庫舊有之西征洋款改爲加放俸餉一款并新籌之鹽斤加價一款及應提之廣東闖姓捐輸一款三款內奏銀二百萬兩作抵外下餘

一千萬兩派令各海關分認五百萬兩各省司庫分認五百萬兩量其物力定以等差開具清單恭呈 御覽請 旨飭下各省將軍督撫查照臣部單開分認數目於各省所收地丁鹽課鹽厘貨厘雜稅及各海關所收洋稅洋藥稅厘項下除常年應解京餉東北邊防經費甘肅新餉籌備餉需加放俸餉加復俸餉旗兵加餉固本京餉備荒經費內務府經費稅務司經費本關經費出使經費等項仍照常分別批解留支外其餘無論何款俱准酌量提劃各照分認數目按期解交江海關道彙總付還俄法英德兩款本息明知各省庫儲均非充裕而款巨期促不得不預令分認以免臨時貽誤該督撫等公忠夙抱自當分任其難共維大局不得推諉如各將軍督撫司道按期照數解清擬照籌解甘肅新餉成案按年由臣部彙總 奏請獎叙至此外匯豐等款本息并袁世凱等軍餉乾應由臣部另行籌辦合併聲明所有每年應還俄法英德兩款本息數巨期促擬由部庫及各省關分別認還緣由理合恭摺具陳伏乞 皇上聖鑒訓示謹 奏請 旨

謹將俄法英德兩款每年應還本息約銀一千二百萬兩內俄法一款約銀五百一十萬兩英德一款約銀六百九十萬兩今由臣部指撥鹽斤加價加放俸餉廣東閩姓捐輸三項共二百萬兩內應分還俄法英德兩款各一百萬兩權派各省地丁厘

金等項共銀五百萬兩以二百零五萬兩作為認還俄法之款以二百九十五萬兩作為認還英德之款攤派各海關洋稅洋藥稅厘共銀五百萬兩以二百零五萬兩作為認還俄法之款以二百九十五萬兩作為認還英德之款所有常年指撥攤派細數分別開列清單恭呈 御覽

一俄法一款應還本息每年約銀五百一十萬兩由鹽斤加價項下指撥

長蘆四萬兩 山東一萬兩 河南三萬兩 四川十五萬兩 廣東五萬兩

浙江六萬兩

淮南四岸共十三萬兩由某岸應解若干應由兩江總督核定

河東三萬兩 湖北川鹽六萬兩

由西征洋款改為加放俸餉項下指撥

浙江五萬兩 福建五萬兩 湖北五萬兩 廣東五萬兩

由廣東閩姓捐輸項下指撥

閩姓捐輸二十四萬兩

以上共撥銀一百萬兩內閩姓捐輸一項係臣部上年九月奏准解部充餉行知在案應令該省照此次指撥之數分別提解其各省鹽斤加價及加放俸餉除此次指

撥外下餘之款仍解部庫

由各省地丁鹽課鹽厘貨厘雜稅等項下指撥

廣東二十四萬兩 江蘇二十萬兩 四川二十萬兩 湖北十六萬兩

河南十四萬兩 浙江十六萬兩 直隸十二萬兩 山東十二萬兩

山西十二萬兩 安徽十二萬兩 江西十萬兩 湖南十萬兩

福建十萬兩 陝西十萬兩 廣西七萬兩

由各海關洋稅洋藥稅厘項下撥派

江海關四十萬兩 粵海關卅六萬兩 閩海關十六萬兩 浙海關十六萬兩

鎮江關廿二萬兩 九江關十八萬兩 江漢關十六萬兩 宜昌關八萬兩

重慶關四萬兩 蒙自關四萬兩 甌海關四萬兩 津海關十二萬兩

東海關三萬兩 山海關四萬兩 蕪湖關二萬兩

以上指撥并撥派共銀五百一十萬兩查本年應還俄法息款十月間係第三期應令各省關照工部指撥撥派之數各按四成於九月內解赴江海關道交納嗣後每年分作二次於三月解交六成九月解交四成不得稍有延欠并令江海關道將收到某省某關款項隨時電達臣部備查

一英德一款應還本息每年約銀六百九十萬兩由鹽斤加價項下指撥

長蘆四萬兩 河東二萬兩 廣東五萬兩 山東一萬兩 四川十五萬兩

浙江六萬兩

淮南四岸共十三萬兩由某岸應解若干應由兩江總督核定

河南三萬兩 湖北川鹽六萬兩

由西征洋款改爲加放俸餉項下指撥

浙江五萬兩 福建五萬兩 湖北五萬兩 廣東五萬兩

由廣東關姓捐輸項下指撥

關姓捐輸二十四萬兩

由各省地丁鹽課鹽厘貨厘雜稅等款項下指撥

廣東二十八萬兩 江蘇三十二萬兩 四川三十二萬兩 浙江二十二萬兩

湖北二十二萬兩 河南十九萬兩 直隸十七萬兩 山東十七萬兩

山西十七萬兩 安徽十七萬兩 江西十四萬兩 湖南十四萬兩

福建十四萬兩 陝西十二萬兩 廣西八萬兩

由各海關洋稅洋菜稅釐項下攤派

江海關六十萬兩 粵海關五十二萬兩 閩海關廿四萬兩 浙海關廿四萬兩
鎮江關卅二萬兩 九江關廿六萬兩 江漢關廿四萬兩 蕪湖關四萬兩
宜昌關十二萬兩 重慶關八萬兩 津海關十八萬兩 東海關五萬兩
山海關六萬兩

以上指撥攤派共銀六百九十萬兩查本年應還英德本息其期甚迫應令各省關
照臣部指撥攤派之數先分一半務以六月間解到江海關道其餘一半銀勻分二
次八月間解到一半十月間一律解清嗣後每年勻分四次於二五八冬四個月解
赴江海關道交納不得稍有延欠并令江海關道將收到某省某關款項隨時電達
臣部備查

再朝鮮一役饑軍購械合天下全力以供之僅得無誤今又派令各省關分仍應還
俄法英德兩項借款每年一千萬兩計各海關歲入洋稅洋藥稅除常年留支起解
外尙有盈餘可以抵此五百萬兩之數而各省地丁鹽課鹽釐貨釐雜稅則僅敷留
支起解之用一旦令其攤派認五百萬兩巨款未免無米之炊然天下財賦出於各
省藩運各庫者數倍於各海關若均能仰體時艱早爲設法力除中飽嚴汰冗費則
籌此數百萬兩似尙不致十分爲難是以臣部迭議整頓賦稅裁減兵勇冀得及時

補直又以償款太巨恐陳萬難籌措情形請 飭各省將軍督撫通盤籌畫如有可
興之利可裁之費於國有益於民無損勿畏繁難勿避嫌怨勿拘成法務令各行所
見奏候 聖明未擇均經欽奉 諭旨允行而各省覆奏率多空文鮮有實籌
卽按照 臣部所擬條目舉行一二而亦大半截留本省應用終致有名無實然則此
三十餘年內之還款其將何所取給哉且無論三十餘年也卽以本年而論英德一
款本息計七月八月共二期每期各需銀一百十餘萬兩九月至十二月共四期每
期各需銀五十餘萬兩俄法一款十月間爲第二期亦需銀一百八十九萬兩共約
需銀七八百萬兩轉瞬卽陸續屆期既無餘款可撥又無閒款可挪 臣部又將何以
應之哉蓋此次借款實從古所未聞卽 臣部辦法亦出於萬不得已惟有酌量各省
歲入之多寡定爲分認之等差俾各省趕緊設法竭力通融以上等 宵旰之憂
勞下應強鄰之諾責庶幾不失大信不誤邦交天下幸甚所有 臣部擬定各省分認
俄法英德兩款情形理合附片 陳明伏乞 聖鑒謹 奏

國債

國之西士曰國債愈多則民心愈固是以泰西各國莫不有千百十兆磅之債其下
議院爲富民總籌梓有急需計日可集以上下之決洽於平日者有素也富如英查

利同治十三年時尚有國債七百八十四萬九千四百九十四萬二千一百三磅歲需利銀二十六兆八十萬四千八百五十三磅計利銀其財力未嘗不可清完而仍留此有餘不盡非以償爲國與民所相維相繫者哉中國歲入七千數百萬無事時僅供歲出一邁變故募兵籌餉便有浙矛炊劍之歎不得不息借洋債以掄然眉無論閉糴可危也即隨借隨應而泰西近用金磅借時以金折銀償時以銀折金層層貼耗較子利反加幾倍洋債之利歲不過四五釐而過手者必居闈播弄暗增至歲七八九釐以逐其烹分之計日積月削漏卮以成嗟乎此直飲鴆止渴耳今將於平日就舉地息借商款以開國債風氣而吾民之信

朝廷每不如其信商號大小商號之設其就近必有以銀存放生息之人獨至

明詔息借而吾民反深閉固拒非民之無良敢於不信

朝廷特不信官與吏耳夫在上方授芻牧於官吏而吾民以爲虐我則警疾首蹙頞恨不得一反於有司其肯以錙銖所積者寄食於狼虎之口哉誠改官庫爲官號試借國債所有出入可以不經官吏民知號商之較可恃也必有踴躍輸將以資兩利者是亦籌備緩亟收回中國利權之一大宗也

官號

國家雜正之供出入必於庫有庫必有官有官必有吏一欸之出入解有費收有費
發有費平有費批遇有費一費偶闕色有寶紋松江之優劣平有庫京漕湘規津各
省之重輕扣減擡抑高下留難無所不至管解領解者其於庫中人殆不敢以正眼
視其入庫之項款目緣多論律濫濫即冷與鹽布祿王戎持籌亟切無從稽核司庫
者知此覆之未易抉也他物廣填暗地耕創堂司各官明知之而不欲明言之蓋備
中人皆有例入雖王且亦以美珠藉口矣內而大臣外而委員非不屆期整查而盤
查之寬嚴仍視例入之厚薄豈無一二實事求是名一錢者勢不能以一手一足
罄庫中所存而逐件檢校仍由左右者爲耳目而財神初無不盡之時嗟乎以至重
要之地而弊漏不可究詰若此尙可以終日哉今請自內部以至州縣所有官庫
悉改爲官號撤去司庫之官若吏招殷商任其事其集股而成者聽恐商或外強而
中乾也須驗其實在所積本銀若干數一商承乏必以其地殷商數家聯環保結稍
有虧耗唯保商是問方給憑照以庫權委之得商人周轉於官與民之間收解平色
均有定章有大市無所用其伎倆出入若干欸一釘一孔皆商乎取之亦可稽盤查
之故事官庫之積弊庶幾權陷廓清乎試觀捐輸例開京外捐生不願赴庫上兌反
託各號代捐非以部庫欺人關館任意各號稔悉章程部庫無從抽勒故捐生趨之

若市而號商轉得居閒以沾其餘潤改庫爲號亦此意而已近時閩廣津滬各海關
所有徵解稅款均由號商出入有官銀號之目大可推廣此制計於

朝廷有大利五向來度支專款儲積非因公支發例不得動借分文而者利之夙句
結市僧暗挹公帑私權子母以自封殖亦未必一一實儲在庫也官號既改隨時隨
數不妨通融存放市面既覺流通生息胥違公項利如刀布如布流如泉其利一中
國鑄錢在京曰寶源局曰寶泉局堂司皆以爲利窟糜費多而裨益少各省錢局舉
廢不一官錢不廣故私鑄益騰竊謂京外各局一律裁撤予官號以設鑄之權由商
自行料理不以官與開銷既減錢路自寬以商察民較爲切實私銷盜鑄不敢自清
其利二墨西哥銀錢每圓重七錢三分必雜銅質八九分而後聲光俱足通行內地
者數十年漏卮如恆河沙數近廣東福建等省議由官鑄官鑄之費決不如商鑄之
精不如責令官號自購機器鑄造上鑄滿漢文以示國制每圓重一兩對開者五錢
不必鑄一錢半錢者轉嫌瑣碎分兩既有一定平色庶免紛歧一兩中可雜銅質幾
及一錢獲利不可皆算該號必樂於从事其利三鈔幣即前代交子會子之制泰西
盛行之中國獨怯爲稅政何以京外各商號銀票錢票布滿市中以司農之會計不
如市僧之經營非以官令民畏而商與民親乎可額定鈔幣之數分按各官號成本

減等搭用完糧輸稅發饌一律通行如支見錢官號見票即付行之既久商民之視鈔幣較銀錢爲簡而易行爭相實用其利四泰西遇貿易有贏餘者例稅若干成官號既各擅一隅之利權日積月累歲計有餘可仿西例就各號贏餘計成收稅自部庫至州縣其改爲官號者不下二千家歲稅必成巨款國用大可挹注其利五大弊可除大利可興直兼周之泉府漢之平準而一之豈若宋之均輸市易厲民自養特小人移財用所爲邪比閻某大僚奏請在京開設華德銀行請之者但計一隅之利尙未台全局以通籌沮之者但計一時之害而不熟商情之肯綮甚矣非常之功必待非常之人也或謂改庫爲號以商代官殊失政體彼筦子之霸齊也且以女閭聚商至毒流萬世而不顧以非富則不能強也若以官號爲失政體豈各庫種種舞弊蠹國病民轉爲之得政體乎嗚呼安得如筦子者而與之策富強哉

日本東京古城貞吉譯

銀貨問答

美國人士以銀貨爲現時握要之圖議論洵洵不可遏抑紐約撲士打報館覓當路諸公意見設爲問答之詞撮其要旨譯錄如左

問主銀黨論者宗旨所在何如曰銀價賤落制錢爲之減色謂國家鑄造之金銀錢因而物價

益賤落此蓋主銀黨之人所據以為口實者也
物之價值亦由此賤落故主銀黨持此議以取主金黨也
問鑄錢而供給所需用亦有減乎曰不然凡物於此
供給則錢亦然
問然則於其事實何如曰以美國實情觀之供制錢之日有增加
昭昭明矣據千八百六十一年統計美國制錢為四億四千二百十萬二千四百七
十七元而在千八百七十二年多至七億三千八百三十萬九千五百四十九元又
據大藏省公示本年七月一日所實存之數為十五億五千五百五十八萬四千二百
八十三元
問制錢增加現情如何曰以本年比千八百六十年已增加二倍四分
又比千八百七十二年已增加一倍一釐也
問以何方法能證明之乎曰以每日
所現存之人口總數除同日所行使之制錢總數得人與錢之平均數也
問其所
得之數若干曰美國通行制錢據千八百六十年七月一日計算人口一名約有十
四元六仙在千八百七十二年七月一日則一人約有十八元七十仙而在本年七
月一日則一人有二十一元三十五仙之多矣
問美國情形或然然遍地球各國
恐於制錢有減色也曰決不然蓋亦有增加之迹焉
問其證據如何曰據新產出
之金塊統計也
問然則新產金額可得聞乎曰憑造幣局總理報告以為據蓋自
千八百七十三年至千八百九十四年地球所產出金塊總計實二十五億二千六

百八十三萬四千九百元云。問金塊新產出額有增乎抑有減乎。曰其增加之迅速也可無論矣。問然則其數約若干。曰據千八百七十三年統計地球金塊產出額九千六百二十萬元。千八百八十年一億六千四百三十三萬六千八百元。千八百九十年一億一千八百八十四萬九千元。雖千八百九十五年統計尙未明確。必約一億九千九百五十萬餘元也。問由是觀之。果何所爲也。曰爲地球貨幣之增加。故以每年所增加之金塊。比前二十二年。足見增加兩倍以上也。問產金之數現時雖有增加之勢。恐將來亦有衰減也。曰不然。如亞美利加、澳洲、南亞非利加等。礦學家尙肯輟業乎。將來產出諒必出於今日之上無疑也。問雖然。爲以銀塊不爲制錢。故於供給每年所增加之金屬制錢。得無或阻礙乎。曰不然。問其理由如何。曰據千八百七十三年統計。地球上金塊產出九千六百二十萬元。而銀塊產出八百八十萬元。卽合計一億七千八百萬元。然據千八百九十五年。卽昨年統計。金塊產出一億九千九百五十萬元左右矣。亦可以見其於供給制錢無阻礙也。問本那爾時產金數。出於今日之上。確否。曰不然。問然則當時產金之數約若干。曰自千八百五十六年至千八百六十年。統計地球產金。每歲約一億三千四百八萬三千元。產銀約三千七百六十一萬八千元。合計一億七千七百七十萬一千元。比諸客

歲千八百九十五年產金額多至二千七百八十萬元也。問然則主銀黨之論謂自停止行使銀錢，致貨幣供給漸覺縮乏，果何謂也？曰是全坐一大謬見，試合環球之情形而論，又合美國之現情而論，可知其說之謬也。問雖然，自小麥下至各種農產物，其價皆賤落，豈非實事乎？曰然。問然則其理安在？曰無他，環球皆以農業爲重，以增其收穫，出產既多，價自賤落也。問農業畝畝之增加如何？曰自千八百七十二年以來，至今南北亞美利加及亞細亞，增加農業地畝，蓋爲前古所未有也。問日下販賣小麥，有相競之勢，何故也？曰爲年開銷路於四方，多爭上於市場之故也。問於何國市場爲最夥乎？曰英國哉。通地球購買者，十之八九，必仰穀類之供給於英國市場也。問其販賣額約幾許？曰據英國所銷流者，統計其輪進小麥，而又輸出之者，實爲五千五百二十六萬九千九百二十四石，多爾威多。一合多爾威多當日本十三冊。比諸前數年，見其增加，蓋亦莫大焉。問何產小麥之多至此也？曰由於印度俄國烏桓圭西方等產穀地，增轉運之便利也。問於北美國，亦如斯增加乎？曰增加日見其益。問其額約若干？曰據千八百七十五年統計，美國產小麥地有二十六萬三千八百五十二邊哥，至千八百九十一年，則增至三千九百九十一萬六千八百九十七邊哥，即實增加十之五也。而千八百七十五年所產出爲二

億九千二百十三萬六千不士耶。一不士即當日本一斗八升千八百九十一年產六億一千一

百七十八萬不士耶。如前千八百九十五年大減農業。且有凶荒之嘆。而猶且產出

四億六千七百十萬不士耶矣。問獨小麥有增加乎。曰餘穀類亦有增加焉。問

敢請舉其例。曰在千八百七十一年。美國開墾地三千四百九萬千二百二十七畝。

至千八百九十一年。得七千六百二十萬四千五百十五畝。又以前年所產出穀

類。比諸千八百七十五年以前。實當二倍以上。耕作燕麥地。及其產額。亦二倍於千

八百七十一年以來。又以千八百九十四年所產棉花。比千八百八十七年以前所

產出。實增加十之五也。問如斯情形。則致穀類及棉花落價。亦不可免之數乎。曰

然。凡物產之競售也。與衣類器具。書籍。鋼鐵軌條。小針等類之落價。亦同一理也。

問然則當此時。自由鑄造銀錢。謂民間有鑄錢之國家。由國家為之鑄造銀幣也。利於耕作穀類者。不亦大

乎。曰不見其然也。問其理何在。曰銀錢之數增加。而穀價亦覺騰貴。凡百物價亦

因之騰貴。於農夫等。不見利益。則必望銀錢之不增也。問王銀黨之論。亦當統計

實數。以定權衡乎。曰未見其有所據也。問然則無精確之論。又曷能主張其說乎。

曰苟欲論此事。宜援引制錢及產物而統計之。斯為可據耳。王銀論者則不然。宗旨

之誤。蓋在此也。問然則主張王銀黨之說者。何故不出於此途乎。曰彼其意蓋恐

援據此說，卽爲所駁，詭無以自申其議，猶值冠兵而資盜糧也。問能有謂以石統計之說爲非者乎？曰：必無懷疑於其間者也。雖彼主張主銀黨之說者，亦必深服是說也。蓋所言統計之法，據美國大藏省農務省及統計局所公示之報告，並造幣局總理之報告，及英國商務局報告，逐一綜核，亦足以昭信矣。美國本有主金主銀二黨，今當國者主金黨也。

此論亦主金黨所撰，攷理金而抑銀，于主銀黨論議之長處，亦不復述及，特開之，可以知金銀消長之故，歐美貿易之情形，故譯登於報。

時務分類文編卷二十

各國船政

譯漢塞爾所著列國歲計

自一千八百九十五年七月初一日起至九十六年六月三十日止各國註冊輪船
 帆船凡一百噸及以上者計三萬三百六十八艘合二十五兆十萬七千六百
 百三十二噸其中輪船居一萬三千二百五十六艘計十六兆八十八萬七千九百
 七十一噸帆船居一萬七千一百十二艘計八兆二十一萬九千六百六十一噸
 英國造船數目○九十四年英國新造入水之船除兵船不計外共計六百十四艘
 合一兆四萬六千五百八噸其中輪船五百九十四艘計九十六萬四千九百二十
 六噸帆船六十五艘計八萬一千五百八十二噸英國自用者百分中幾八十七分
 其造船所需之料百分中鋼居九十八分六釐居一分四釐原文一分二釐
似誤今校改輪船用鐵造
 成者祇二釐一計一千九百噸一計一千二百噸此外皆漁船每艘無過三百五十
 噸者帆船用鋼造者百分中居九十七分九釐用鐵造者祇二分一釐原文五
厘似誤九十四年
 所造船之噸數比九十二年實多二十一萬噸其中輪船噸數加添尤多九十二年
 所造各船百分中帆船居二十四分九十三分九十四年不及八分也
 帆船減少緣由○商務清淡之時用帆船載貨似比輪船合算因非急於待用之貨

用帆船遲遲轉運但當棧房之用其益處亦有過於輪船者且其益處尙不止此以其裝載貨物需時甚久每非數禮拜不可貿易場中因此又得以買空而做期頭生意況造價及行船之價又比輪船便宜乃帆船雖有此等益處終不及輪船之美輪船行駛之法各國隨時整頓致帆船載貨之價遂不能如前此之賤於輪船矣貨之由帆船載運者現已年減一年英國與澳大利亞與羅斯美尼與紐西蘭各島往來貿易從前全用帆船以當時輪船用煤太多載貨獲利甚微耳現在帆船所做之生意皆輪船所不屑爲者也中國印度日本緬甸新加坡等處與英國往來貨物皆取道蘇彝士河均用輪船英國進口貨物由帆船承辦者其在美洲之沿太平洋各處及南阿美利加之東南沿海各處乎卽此數處間亦有用輪船裝載者帆船數目太多用場太少不覺空閒推其故大帆船比輪船失事更易因大帆船比中號之船駕駛尤難故大帆船保險需費亦格外巨大乃當今水脚甚賤非大帆船又難獲利詎知帆船愈大駕駛亦愈難雖配有氣機備在海面轉動風帆鐵鍊之用無風時可使行駛以代風篷有風時可抵風力免吹近岸其如不能補救於萬一何至裝煤裝五穀各帆船因貨過重遭險尤多也

商船可代兵輪之用 英法德美各國凡有輪船公司造行走海洋輪船能於軍務

時改作快兵船者政府必從優給予津貼以示鼓勵英國海部船單上所有商船均照海部章程而造者甚多此等商船均能裝配軍器雖未與政府訂立合同說明情願聽候國家調用譬如華利恩得爾輪船公司政府曾欲給予定銀公司雖有文仍將其所造之船不獨遵照海部定章並有比海部定章尤相宜者以備改其有輪之用其近造輪船名屋否之法最易改作兵輪且貯煤最多若每點鐘行十八海里半能連駛一萬四千海里若每點鐘行十海里能連駛一百三十天無須吊行裝煤該船載重六千九百十噸馬力一萬匹

小快輪 近來小輪之行走內河海峽並濱海各處以及短程途者速率大加整頓其中數艘有事之時用作探船最稱合宜此等小輪有明輪有暗輪之分每點鐘能行十九海里或十九海里以上有行英格蘭及歐洲各國有行英格蘭及阿爾蘭及海峽各島亦有行蘇格蘭及阿爾蘭各處之間者其中每點鐘行二十一海里者凡六艘行二十海里者七艘行十九海里者十七艘近有某公司與政府新訂合同在於好雷黑及根思打之間往來攜帶書信照此合同該公司尚須添造雙輪輪船四艘船身須比現在所有各船尤大往返帶信尤速蓋至遲須行二十二海里也

海洋輪船將來速率 俄國政府在英國牙洛廠新造一滅魚雷船名栗殼爾者觀

其試驗之效，即可知輪船行駛速率，將來尚能復加。該船經官試驗時，每點鐘行三十海里，有奇。凡欲加船速率，必須講究二法：曰福斯屈蘭夫，曰應調斯屈蘭夫。用此以加煤火之力，及生發之熱氣耳。其用福斯屈蘭夫之法，以鍋房用相宜之門關閉，使天氣不得由其門而入，鍋之火爐所需天氣，出能轉動之風扇，將入氣從船面而入鍋房。既入之後，鍋房內之天氣壓力，自比在船面之天氣壓力更大。用氣若干，可表測所入之天氣，欲從鍋房騰出，非經過爐墊不可。遇爐墊時，以其壓力較重，使爐內天氣頓加。爐內之煤遂發火愈猛，發熱氣水氣遂愈多也。其用應調斯屈蘭夫之法，則開鍋房，放入天氣，將風扇放在煙筒根內，因風扇轉動不息，近煙筒之根有幾分，遂成無天氣之空處，轉動風扇原為將爐內熱氣向上經過煙筒，與天氣一併驅出。如此一驅，使鍋房之氣經過爐墊，拉進煙筒，通至外面，一路騰出較速也。

按此篇原文列表甚詳，因篇幅太狹，不能全錄，容後續詳。

陳侍御壁 論整頓船政摺

奏為船政整頓伊始，敬陳管見以備 采擇，恭摺仰祈 聖鑒事。竊臣前奏請另簡專員，規復船政仰蒙 聖明洞鑒，近日敬聞 命福州將軍裕祿兼充船政大臣，朝廷知人善任，以權稅之官兼將作之選，工程款項並責諸裕祿觀成，可指日待矣。

然臣有不能已於言者。泰西以水師爲命源，水師以船政爲根本。外國船員不及中國二三省，製造之廠林立，養廠養船之費，君臣上下並力任之。中國沿海萬三以所占海面最廣，左宗棠沈葆楨議創福建船政，實海防第一要著。自由德國購鎮遠定遠數船歸後，侵蝕虛冒，無有發其覆者。且照例有異常勞績保案將校，無辜旗斬將之功，坐致專閫。委員無經商販賈之勞，立成巨富。蠅營狗苟，傾軋成風。勢不詆毀船政，使師船盡出於購買，不止也。豈知船政所製之寰泰鏡清開濟較南洋之南琛南瑞爲優，已見諸劉坤一之奏。船政新製之平遠鋼甲較北洋定購之致靖經來式不甚遠，費且大減。大東溝之役，並駕齊驅，屢受巨彈，船身並未損裂。謂自製之船不足以任戰，豈平情之論哉。今朝廷以船政委裕祿，若以裕祿爲國勳舊，休戚相關，必能任怨任勞，力顧大局。然使以籌款專責將軍，而戶部總理衙門便可不問，則海關一出一入，各有指撥，即使按月五萬舊案掃解於製造鑄甲，一年一船之用，猶恐不敷。況其力顧京餉及新派洋款，考成解數斷不能足。則船政屬之將軍，與屬之總督，何以異乎。沈葆楨在船政前後十年，廉以持己，嚴以率屬，取廠中一草一木者，立案軍法，令行禁止。其取材多用土人，成効必獲信賞。人無異念，咸有競心。臣居同里，聞實親見之，亦中外所備聞，而無異詞者也。蓋以船政關係重大，非他省機器等

局可比。不以軍法從事，則整齊畫一之規模不立，不多用士人，則官場習氣，剷除不淨。老成規畫，用意至為深遠。自英將琅威理回國，北洋海軍之操演虛，自出洋局之監督撤，船政學生之肄業廢，工用蕩落，消息阻絕，解款日蹙，成船日稀，良可惜也。夫上海製造局，以道員管理，每年造炮數尊，江海關二成洋稅，按月劃濟，歲約百萬，船政以專派大員，責成製造師船，解款又不及十之二三，無米為炊，在事雖銳意翻新，其可得耶。應請飭戶部及總理衙門，於三五年之間，每年籌的款二百萬兩，交船政大臣為製船開礦之用，並由總理衙門照會德國外部，由該國國家代中國精選洋總監工一員，洋匠數員，礦師兩三員，立定合同來華，交裕祿委用，限定每年成船若干，得礦若干，即以此為船政大臣之考成。數年之後，成船可敷海軍之用，礦產可濟船工之窮，縱使一時無可籌劃，多借洋款，一氣呵成，未為失算。裕祿任安徽巡撫，湖廣總督，甚有政聲，將軍衙門旗務極簡，且有副都統同城，足以助理，所管海關各口，多在沿海一帶，船政離省水程五十里，往返不便，前此督臣兼管，每月蒞工僅一二次，駐工之員奔走稟承，尤多曠職，則此次裕祿之兼辦船政，非移駐署中親督率，不可。甲申之役，穆圖善出駐長門，敵船恐塞出路，不敢登陸，以迫船廠，是其明證。閩省海口，重山疊嶂，波流紆折，若兩岸砲臺得力，水陸控制得地，敵船斷難飛越，船廠既

屬深藏新成之羅星塔船塢尤占形便一切新式鐵甲出入俱屬村宜儘可自製是
爲船政計將軍應專駐船政爲控制海防積稅務計將軍亦應移駐船政也抑臣更
有請者船政員紳薪水本不甚優雖屬在官無異寒士而海關處脂膏之地在事員
役積習相沿由來已久雖將軍正己率屬一時亦驟難轉移應請 飭下該大臣查
照舊案遴選官紳士人分執其事勿得參用海關員役致壞風氣所有督催工程驗
收料物支發款項稽查工課皆按開廠初年成法而加密焉在事官紳人等濫竽
者革逐舞弊者治罪弁役盜竊官物者立時以軍法從事俾人心知儆耳目一新將
軍任滿之日應如何 特加委任使奏全功則 朝廷自有權衡非 微臣 所敢妄擬
總之以船政責成裕祿者爲 朝廷破格用人之異數不得視爲將軍照例應得之
兼差籌船政款項爲中外臣工之公職非裕祿一人之私責則船政幸甚大局幸甚
臣爲海防根本起見理合具摺瀝陳伏乞 聖鑒訓示施行謹 奏

輪船

輪舟鐵路電信火器銀行五事孰爲之天爲之也天以是宏大一統之規爲四海會同之法物
也異日者陸皆鐵路水皆輪舟火器以詰兵戎電信以通文報銀行以便旅人而後山海失其
阻深道里忘其險遠城郭之高堅不足恃疆界之彫域不必分天下之人順天者存逆天者亡

先天者興後天者廢而今而後雖百世可知也中國盡測管窺不知通變內江外海既縱各國以行輪而獨於本國之民深閉固拒禁其製造駛行跬步之聞千里懸隔風濤顛險覆溺時聞商貨不通生機將絕而通商各埠則行旅輻湊便捷靈通一彼一此之間勞逸安危迥殊霄壤民間共知輪船之利屢請試行而當事迂拘屢加斥駁斷然曰畏敵國之效尤也慮貧民之失利也夫物各有主理之所在西人不能強爭有曠土焉我終棄而不耕則客民至矣今慮客民之侵佔預禁土著之耕耘伊古以來安有是理夫輪船所達則商務驟興貧民隨事可以謀生何必概操舟楫况輪船之側小舟如螻失業者何人今內河固未行輪也然而市肆蕭條帆檣寥落禁止之有益於貧民者安在至沿海各埠則閩粵商賈暗製輪船挂外國之章旗納他人之稅鈔爲叢廠雀爲淵鰲魚若惟恐華人不貴而西人不富也者當法越有事之際商局艱船慮法兵載劫詭寄他人華商例禁行輪局外不能偏助以致接臺一舉支絀萬分若泰西各邦偶有兵事則商民輪船理應報効國家轉餉徵兵一呼可集我之支絀如彼彼之利便如此而無事之日既閑閩閩之利源有事之時復誤朝廷之大計迂疏固執徒苦吾民此何爲者也

謂宜

明諭天下准中國商民自製輪船行駛內河以及外海所在官吏查係華民給與憑單量徵船鈔經過關卡靜候稽查倘有風鶴之驚違章報効國家暫停貿易至內河行輪乃中國自有利

權衡後無論何國概不得藉口游歷援例駛行否則滋生事端中國不能任保護之責如此分別辦理既以廣華民之利賴卽以杜異族之覬覦江湖之險阻胥平物產之流通無滯上裨國計下順人心卽或外患內憂致煩兵力可隨處拘集商船載兵飛達刻日蕩平既收轉運之功復省養船之費便孰便於此者若之何膠柱刻舟因噎廢食顯損大局隱益西人終蹈接臺之覆轍也

呈請開辦江西內河輪船公牘

具呈江西在籍紳士分部行走郎中鄒凌瀚舉人鄒凌沅等爲援案呈請承辦江西九江內河等處小火輪船疏通土貨拖帶船隻力爭先著以維商局以保利權懇求憲台批准立案事竊維通商以來輪船暢行各省內河尙嚴禁約乃自海口有事新定約章准令機器製造土貨通行各省則內河輪船此時我不爭先創辦日後彼將次第舉行待漏卮之日多恐補牢而無及近日恭聞上諭飭令江浙等省購置小火輪船於內河運貨以收利權仰見廟算周詳莫名感服現在江南業已遵旨速辦稟承憲台批准在案江西地處上游號稱腹地上有灘河沙淤之阻下有鄱湖風濤之虞阻滯守風動經旬月或逢巨浪船貨俱傷百物滯銷商務無色揆厥所由實在於此而土貨所出若茶葉若茶葉若夏有若紙張若煤鐵實爲大宗而蒸罌茶

葉尤爲彼族所重租界雖非其所議仿造難保其不來製造既成必嫌阻滯既嫌阻滯輪船必行待彼之輪船既行則我之商務益蹙矣今等目擊時艱冀維商局謹擬援照江南成案試辦小火輪船六艘自吉安至吳城爲淺水輪船二艘自吳城而九江爲深水輪船一艘自九江至饒州爲深水輪船一艘停泊之處各立馬頭並設公局以備稽查詳細條目另見章程其中汽機之迅速商販之暢銷行旅之便往來餘利之助餉糈以及救生賑災行兵運餉凡諸利益久在蓋籌況已江南有案尤可不須覆述惟是江西通省紳士稟請行船事經數次若非事洽輿情何以一再不已前承德前撫憲批准卒至中止未行大約堅持舊說者謂害有數端一利未敢言請言其無害試爲大人一詳陳之所謂害者不遍曰民船失業也河道礙行也釐金減色也船關無著也外人效尤也不知小輪船之設利在拖帶搭客不能多載運貨豈容大裝而民船行駛實畏風波往往船坐食而絕糧貨後期而失利若有輪船拖帶則昔一月而兩週今浹旬而十轉出口之貨既速入口之貨必多銷旺則利通物聚則利厚民船載貨應益增多孰得孰失豈待煩言若謂內河狹曲碰撞堪虞則蘇杭類多小河何以暢行無礙且官輪行駛多年未嘗稍有蹉跌商輪關係成本尤當行以小心乃爲適當之疑恐非平心之論至於江省卡釐最爲繁密祇緣港汊之歧

因防偷漏之弊。若有拖輪。則行駛迅速。勢難中停。於上載時。驗貨給票。收釐於卸載處。收票復驗。以防隱匿。無丁役中飽之嫌。省分局油銷之費。事簡則易理。用少則取贏。更涓滴之歸公。何減色之足慮。若謂關稅則更無妨。九江既爲停泊之所。關吏即可測量之時。行輪之往來。有期。胥役之候查。尤易。且船經拖帶。每月可上下多回。則逐次輪鈔。關稅必頓增十倍。惟求批示。關憲飭令。毋得稽留。酌定停輪時刻。明立意程在案。則公私兩得。而通行不滯。免至惠外人之效尤。更非今日之通論。貨既有定約。行輪將在意中。必待臥榻之睡。酣始議改絃。而易職洋旗一國。萬卡無聲。商盡因依。百弊滋出。其時驅之不能。分之不可。公家則釐稅兩失。民船則勒捐取贏。高下從心。誰爲定限。何若先事圖維。使彼無利可牟。靡然思返。故論者慮外人之入室。猶等憐他人之我先也。凡此數端。管見所及。實有利而無害。且宜速而勿遲。應請援照江南成案。批准施行。至於事屬創辦。或有不便於官民商旅之處。自應隨時變通。補救。以期無負。聖諭保全利權之至意。除呈江西撫憲外。理合滙情。剴陳。並詳擬簡明章程。十二條。粘單呈核。伏候鈞批。訓示遵行。實爲德便。

署理兩江督憲張批 據稟請援照江南成案。試辦火輪船。係爲變銷土貨。利便商旅起見。已經本部堂奉請准其開辦矣。至所擬章程。以餘利一半充餉。貨物報釐兩

頭兩收於起卸兩處元釐復查驗放行至用機察開挖河道各節應稟明江西藩司九江關道詳候西撫部院酌核辦理仰江西布政司轉飭遵照並錄報西撫部院暨候批示繳稟章併發刻日呈繳

俄擬設太平洋輪船公司

俄人素懷雄志欲通鐵路於西伯利亞之廣野汲汲匪懈已多歷年所矣意謂此鐵路雖落成若太平洋航業落在他人之手則吾志不得伸也乃擬設輪船公司不惜苦心計畫矣黑龍州報者俄黑龍沿道總督府所持以爲利器之新報也其載錄之本論云我西伯利亞鐵路工事將近告成欲使該鐵路大展其鴻圖謀畫計畫蓋爲目前之急務以俄國外交而論該鐵路能窺撫東西之離隔矣何則自歐洲中央至亞細亞東部當銷費四五十日惟由此鐵路則十餘日足矣況又減旅客之費也既減時日又減旅費則自歐洲寄至亞細亞之物不用迂道蘇彝士河而必由此鐵路其餘貨物亦可知已然則該路竣工凡地球各國之交涉與商務爲其所波及決非鮮眇推現時各國航海業務情形將來波及最大者莫如日本與中國也接隣之國惟中國與日本行旅往來貨物聚散莫不由此鐵路且該處地方自興工以來日新月盛形勢迥異於曩昔則日後之事可期推耳

黑龍江沿道一帶地方距俄京甚遠且僻在北方不毛之地故天不惠以物產常仰給於近隣諸國又人口甚少端藉四方勞工之來餬口者然人口日漸增長物產困乏益不得不仰給於四方也情事如斯故西伯利亞鐵路之利便不止沿道一帶與太平洋岸諸地也何者西自歐洲中原起東至太平洋東岸止有中華日本諸國之豐富在焉欲聯絡此等富人而全其便利不如定期開航業於太平洋也苟此業未興則俄國交際與西伯利亞地方之利亦未可謂完成也夫我俄雖設義勇艦隊然該艦隊亦別有任務其經營航路非獨在於就黑龍江沿岸等處連結中華日本而在於連絡阿得斯可伊與俄京也然則當今之時振興太平洋輪船公司豈容已哉

現來往之刺氏倭斯托克即芬河口前譯至中國及日本而連絡交通者

惟有一日本輪船公司耳該公司組織之法確得其宜船舶亦美麗堅固兩箇禮拜開行一次自神戶至我之港另又三箇禮拜開行一次自長崎經由上海至香港今在太平洋面俄之近境與海上交通者已落在外人之手是使外人稱雄於海上也苟如此而遂中止西伯利亞鐵路之前程實為可憂也其於政策姑置勿論商務一端將奈之何使外人恣意蹂躪奪我通商貿易之利昭然在目豈容緘默而已哉且速立所以應之道握太平洋航業於我手裏與西伯利亞鐵路相須而成收完全

之利是爲至要耳不然則握西伯利亞鐵路之利者不在俄人而必在外人是俄
應奪航海之利於太平洋岸要埠可無論已然幹事有先後之分則宜在西伯利亞
鐵路最關繫之埠頭先開航業矣興辦之法當使西伯利亞鐵路撥價低廉又能神速
轉運以杜絕他人競勢之念歐洲貨物由該鐵路聚於之港而散之東洋諸國亦貴
神速其要埠之與此相關者實爲中國與日本諸港是我俄宜向日本及中國先興
航業也請詳言其畧焉曰自之港至上海爲第一此處航路自之港經由日本長崎
此間六百至上海此間四百往航路程千四百海里即合來往核計爲二千二
八十海里今試假算輪船駛力每點鐘能駛十五海里每次往來要銷費六晝
夜半不加算若加以中路寄泊海港銷時約一晝夜及到港起貨休泊約三晝夜
當需十二晝夜日後必須擴張航路也又要自香港至廣東蓋自香港至廣東爲九
十海里所銷時刻約五六點鐘足矣曰自上海至漢口爲第二此間約九百俄里漢
口一帶之地產茶甚鉅若與中國政府訂結專約以搬運該貨則獲利必大且沿道
有南京九江等要府數萬華民來往如織搭載此等行客亦所利不尠也曰黃海沿
岸爲第三此航路自之港起經由元山釜山長崎仁川牛莊天津大沽芝罘上海等
諸埠頭往復約五千海里航此海路除休航時猶要三百三十四點鐘即爲十四晝

夜也。若加以在各埠休航之時，約費三十日。蓋此航路之利，一在連絡之港與北京之通道，一在連絡之港與之界，又使上海聯結日韓諸港，我俄國面太平洋諸地，日漸繁盛，當經庫頁島至黑龍江口，尼可賴夫士克，此間約九百海里，須要八日夜。或十二晝夜也。來往之港與中國各埠口間，約如斯而已。其在日本，則長崎當我要衝，然該島爲往來俄中必寄船之處，故姑以自之港經箱館至橫濱爲第一，函館距之港約四百二十五海里，又距橫濱爲五百四十海里，即自之港至橫濱爲九百七十里。來往此間輪船駛力，每時十五海里，則當要百三十點鐘，且加以休泊各港之時，當銷約十一晝夜。蓋此航路之利，在連絡之港與東京也。又自之港由下關至神戶爲第二，此航路約八百五十海里，銷費時刻，畧與第一航路相似。又以自尼可賴夫士克至在韃靼海峽諸港爲第三，此航路亦與前二者同。抑來往日俄輪船出入海口時，須照美國輪船開行日期，一箇禮拜一次，爲最合宜也。

輪船航路不過如上所言而已。然宜用何種輪船，及若干艘，亦當預籌焉。之港至上，海每一箇禮拜一次開行，來往要銷十二晝夜。故有輪船二艘，則足以辦理矣。若有三艘，更擴張航路於香港，亦無阻礙。自上海至漢口，本不用駛力迅速，而屢繁開行，次數也。先備輪船一艘，一上一下，待輪船益多，乃漸增開行之次數，亦未爲遲也。航

行黃海沿岸當第三十日故每一月開行一次待輪船增加而擴張航路於黑龍江口尼可賴夫士克是為最要也又自之港至上海必寄泊輪船於長崎故航日本諸港用輪船一艘並兩箇禮拜開行一次也一自之港往長崎而至上海一自之港經橫濱而至橫濱故每一禮拜實有交通東京之便若待日後每箇禮拜開行一次則一箇禮拜間即能交通日本樞要之都府也夫欲開行此等航路其輪船噸數客房等類取法於來往黑海諸港輪船公司所管輪船則甚為妥善惟日本海及黃海風波頗激故須一千五百噸以上輪船乃為合用耳抑本公司所管輪船於清潔與駛力及娛樂乘客雖未能驟駕夫外國輪船亦不可讓人以獨步除此之外又宜立絕頂利便以轉運貨物旅客也其法如何曰來往歐亞之間乘客及貨物必運費極廉與不取價一般苟不如此則惡能制勝於外國輪船公司哉又發來往憑單使上下便宜沿路諸驛易於辦事不問其自何處埠頭何處府邑發至俄京來往單便準其送貨物焉又現在之港無一修潔客棧是休止旅客者故當於上下汽車或上下輪船之際使得任意安留輪船房內又輪船開行在海中時日長短必取準於外國輪船公司庶無遲緩不便之弊余早知我俄太平洋洋輪船公司航務與西伯利亞鐵路工業創辦之初均不見有利必損失不貲也然欲得利益自非制外國輪船公司而

奪其既得利權，庶能見我俄公司之利哉。四伯利亞鐵路漸近築成，乏港位置，亦將為地球要衝。外國資本亦將鱗集此地，意不出二三十年，乏港繁華，倍於今日。乏港不獨當日本航路之衝，而為近鄰諸埠口之中樞。則日後將有許多公司與俄相與競勢爭強，昭昭明矣。今俄國興一大輪船公司，豫占地步，以養異日之競，豈不偉乎？
所謂可否姑置勿計，至其以東邦為夢寐，蓋俄國年來之雄圖存焉者也。西伯利亞鐵路幹線至乏港止，其支線亦將至旅順、大連灣等樞要之地而止。西伯利亞一帶荒煙斷草，無人往焉。然於此境設置一大鐵路，俄人之志本非為謀小利也。蓋為國家之雄圖計，故為此耳。讀此本論，最足見俄人之素志，豈得雲煙過眼，顧之手亦可警矣。

小輪

甚矣招商局之坐失絕大利權而不察也。但知與西人分江海之利，而於不賦內河籌自擅之利，豈非目能見千里而不自見其睫者哉。江海各埠與怡和太古鼎立，而三尚有麥邊禪臣等行善謀，其間其利權之收回者固多，溢出者仍不少也。查各國條約外國船隻如私自駛入中國，不通商口岸，即將船貨一併入官領事，不准包庇。同治二年曾有亨里依文洋行之囑，伶小輪私往蘇州，另有魯林旗昌。光緒二年始併歸招商局。費禮查等行小輪，或搭客到蘇，或裝銀至產棉花湖絲等處，均有江海關援約沮止。照會各領事轉飭各洋商嗣後不得用小輪私入內地，有案可見小輪之利西人垂

滙已久幸格於成例不能反汗而爭不解商局何以弄貨於地也如慮成本不專應
接不暇可就近招商包辦而慮地其所餘利之所在趨之若鶩各處內河思行小輪
者頗多均苦難於規始今由商局稟請各省督撫酌定口岸以商承攬凡事有局維
持無不樂於從事包定成數或先繳半價或估產抵押衆擎易舉操縱在我直可坐
享其成商船梭織往來亦便奪其生業可明定章程只准拖帶不准自行裝載無論
何號商船或客或貨由小輪爲之拖帶有不願附帶者聽計三四十匹馬力小輪每
艘需八百金可帶大號商船四五艘較商船鼓棹揚帆速尙倍之人情莫不乘便而
圖捷其不願附帶者亦僅矣小輪收商船之利商船仍收客貨之利有益無害而生
業暢矣轉運便捷水脚減省而貿易盛矣除去支銷所贏必鉅而餉需裨矣零星行
駛繞越偷漏在所不免一坵小輪不能擅便遇卡停輪節節稽征而釐稅旺矣行駛
既速船又成幫而盜警免矣且商船逆風凍雨則止潮汛入夜則止一借小輪之力
斯夕趨行毫無留滯而覆溺稀矣東南各省多由善後局或籌防局官置小輪省或
三四艘或七八艘竊謂均可併歸商局如有必應官差即由商局撥輪遞送有差便
於稽攷無差免於坐食所有支報皆由小輪附遞節節靈通凡沿江海各州縣驛站
酌予裁撤並增遞民間信件以爲郵政之權輿皆足因小輪之利而有利於小輪

借前著爲商局籌之天津爲一路一自北運河達通州南糧制船可備也一自南運河達德州豫東漕糧可備也自德州而濟濟甯令河運抵濟甯交卸則固空便利該省也鐵門關海口將塞不能由海入河自濟甯一至涉南之深口一趨陶城埠至河南遇河工時可資轉運料物也鎮江爲一路一渡揚子而上至清江浦由湖而裏下河可達也一過鄱湖而江西一過洞庭而湖南一自漢口而襄樊若鐵路既開則經叢中原路爲之幹而小輪卽爲枝葉可也上海爲一路一往蘇州等處一自嘉興往杭州彼捆載而來此賄運而去出其涂者衆也廣東爲一路一下游往香港一上游往梧州一湖州上惠嘉而汀贛以轉潮橋之鹽一汕頭嶺海角而揭普潮一帶逐於末者多也以上四路除剝濟甯之漕運豫東之米挽海運之糧轉潮橋之鹽餘皆留爲商船地步而以載客爲主或曰商船慮失業糧鹽等船獨無慮失業乎然昔有執此以尼海運者今不聞水手之滋擾也潮橋之鹽船一隅耳夫何能爲其利分而計之則有限合而計之則大宗裨補庫款辦理海防均可挹注於此近來廣東鄉間渡船半用小輪互市較早風氣已開如再以瑣屑而忽之以煩難而止之各省或有集賭之徒請之於官略徵其地公費自行規設小輪壟斷此利商局欲議仿行則已望塵弗及勒令停止則又呼應不靈嗚呼有此大利西人留以與商局商局顧困循而

坐失焉豈不重可惜哉

公司

貨殖傳曰太上因之其次利道之其次教誨之其次整齊之最下者與之爭今天下之民紛紛然皆爭利者也爭而不善用其爭以致大利之源盡爲外人所奪則上之所爲整齊教誨而利道之者未得其道耳泰西公司之法託始於西班牙四百載以前其國人探索南北美洲泛海西行遠逾萬里一人一家之力有所不足君主資以兵力助以幣金通國之人亦各出私囊同襄盛舉開闢新地務農殖貨利賴無窮西班牙當日之富強甲於天下葡萄牙英吉利踵之於後乃翻開南洋萬島非洲澳洲東連中華西連印度商遂所及兵船隨之教會繼之兼購攻昧取亂侮亡兵餉所資率倚公司之力而通商用兵傳教三事儼如環之無端及印度併入於英遂卓然爲歐西之首國蓋疆界攸分非通而不得入道里過遠非公司不能行而用兵傳教之餘意主於逆取而順守履霜堅冰至木必先腐而後蟲生之英之縱橫四海也非一朝一夕之故其所由來者漸矣風之積也不厚則其負大翼也無力水之積也不厚則其負大舟也無力長袖善舞多財善賈然則公司一事乃富國強兵之實際亦長駕遠馭之宏規也中國周守舊聞兢兢以言利爲戒沿海各埠大權概授於西人比來設立商輪電報等公司行之漸有成效修疆模範小未能遽達重洋而部既開利權漸復然後將絲茶及大宗貨物合官民之力精心

擊畫科集公司南洋西洋寔推濶廣出九州之物產供萬國之取求收已去之金錢保將來之商局夫南洋者西人之外府也所以儲材蓄勢憑陵上國之權輿也我之商力兵鋒曷及於南洋各島彼海外諸國將惴惴然顧畏不遑不必堵穴禽渠而已足招攜懷適矣苟困循積廢漠不關心小民自利自私安知大局排擠傾軋損已益人西人之公司今已龍斷於海疆久且縱橫於內地彼之民日富我之民日貧彼之商益強我之商益弱恐不待兵刃既接而勝負得失之數已有符壤之相應者通商以來五十載矣彼越南緬甸波斯印度之民入中國者皆役屬西人無一富商大賈利權一失生計遂窮既誤先幾徒貽後悔國亡家破大馬終身然後知商務盛衰之樞卽邦國興亡之券也黍離麥秀心折骨悲彼中國乾隆以前亦祇沿海通商一埠耳諸國之君臣方屬然自大拘守成法鄙薄外人又安知未及百年遽有今日哉噫傷已

時務分類文編卷二十一

都城官書局開設緣由

學會報館在西國已成習俗在中國則爲創見是以開辦之始動遭疑阻去年京師設立強學會於城南之孫公園爲諸京官講求時務之地已而改爲強學書局業已購置書器開刷報章旋於十二月間由御史楊崇伊奏請封禁已而言官多有上疏爭之者而御史胡宇宸一疏尤爲婉轉闡切奉 旨交譯署議奏旋覆奏請逕由官辦理正月十七日奉 上諭總理衙門奏新設官書局請派大臣管理一摺着孫家鼐管理欽此此蓋我 皇上至聖至明洞知時務一道非講習則不明非羣聚以講習則不能得其要領茲將都城傳抄總署覆奏一通照錄於後俾有志時事者得所觀覽焉

總理衙門謹 奏爲遵 旨議奏仰祈 聖鑒事光緒二十一年十二月二

十二日准軍機處鈔交御史胡宇宸奏書局有益人才請 飭籌議以裨時局

一摺軍機大臣面奉 諭旨着總理各國事務衙門議奏欽此欽遵到 臣衙門

查原奏內稱京師近日設有強學書局經御史楊崇伊奏請封禁在 朝廷預

防流弊立意至爲深遠惟局中所儲藏講習者首在 列聖聖訓及各種政

書兼售同文館上海製造局所刻西學圖書總印與圖置備儀器意在流通秘要圖書考驗格致精蘊所需費用皆係捐資集股絕無迫索情事所刻章程尙無疵謬此次封禁不過防其流弊並非禁其向學倘能廣運才賢觀摩取善此日多一讀書之士卽他日多一報國之人收效似非淺鮮請旨飭下總署及禮

部各衙門悉心籌議官立書局選刻中西各種圖籍任人縱觀隨時購買並將總署所購洋報選譯印行以擴聞見或在海軍舊署開辦經理既善流弊自除庶於

國家作育人才挽回時局之本心不相刺謬等因臣等維國勢之強弱視乎人才人才之盛衰繫乎學校古者家塾黨庠州序國學自諸侯以達王畿莫不建學大而德行道藝細而名物象數綜貫靡遺是以人才日盛近世學者往往運實驚虛舍難就易視西人一技之長一能之擅或斥爲異學或詆爲新奇不知西人之學無不以算學爲嚆括西算之三角與中算之勾股理無異同周髀經曰圓出於方又曰方數爲典以方出圓言圓之不可御而馭之以方西人三角八綫之法實基於此餘若天學化學氣學光學電學重學礦學兵學法學聲學醫學文字製造等學皆見中國載籍試取管墨關列淮南諸書以類求之根原具在可知西學者中國固有之學西人踵而行之所謂禮失而求諸野耳泰西教育人才之道計

有三事曰學校曰新聞報館曰書籍館英法德俄各國學校之盛或二三萬所或六七萬所生徒率皆二三十萬人美國學校多至十七萬餘所生徒幾及千萬人學校費用自三四千萬至八千餘萬不等率由國家及生徒各出其半各國富強之基實本於是庶政由人才而理人才由學術而成固有明效大驗該御史請將強學書局改歸官辦自係爲講求實學培養人才起見臣等公同商酌擬援照八旗官學之例建立官書局 欽派大臣一二員管理聘訂通曉中西學問之

洋人爲教習常川住局專司選譯書籍各國新報及指受各種西學並酌派司事譯官收掌書籍印售各國新報統由管理大臣總其成司事專司稽察所需經費由總理衙門於出使經費項下每月提撥銀一千兩以備購置圖籍儀器各國新聞紙及教習司事繙譯薪水等用核實散放年終由臣衙門奏銷毋庸招股集貲設不敷用再由臣衙門設法籌措如有慕義之士願捐鉅款或捐書籍准由司事呈明管理大臣酌定核收至建設學舍地方或假官房或租民宅取足教習各官起居之地兼爲士大夫入觀羣書之所因地制宜妥籌布置該御史所請就海軍舊署開辦之處應毋庸議如蒙 俞允再由管理大臣詳定章程定期開設再

該書局現既奏明擇地另設其強學書局原屋應行文該地面官飭令屋主領回

以清界限所有_臣等遵議緣由理合恭摺具陳伏乞 皇上聖鑒訓示遵行謹
奏

官書局奏開辦章程

奏爲請 旨事。光緒二十二年正月二十一日奉 上諭總理各國事務衙門奏新
設官書局請派大員管理一摺著派孫家鼐管理欽此_臣恭奉 諭旨朝夕籌思且
與原辦書局諸臣悉心酌度謹擬開辦章程分條臚列恭呈 御覽

一藏書籍擬設藏書院尊藏 列朝 聖訓 欽定諸書及各衙門現行則例各省
通志河漕鹽釐各項政書並請准其咨取儲存茂列其古今經史子集有關政學術
業者一切購置院中用備留心時事講求學問者入院借觀恢廣學識一刊書籍擬
設刊書處譯刻各國書籍舉凡律例公法商務農務製造測算之學及武備工程諸
書凡有益於國計民生與交涉事件者皆譯成中國文字廣爲流布一備儀器擬設
游藝院廣購化學電學光學諸新機礦質地質動物植物各異產分別部居逐門陳
列俾學者心摹手試攷驗研求了然於目瞭然於心將來如製造船隻槍炮等事可
以別材質之良窳物價之低昂用法之利鈍不致受人蒙蔽一廣教肄擬設學堂一
所延精通中外文理者一人爲教習凡京官年力富強者子弟之姿性聰穎安詳端

正者如願學語言文字及製造諸法聽酌出學資入館肄習一籌經費總理衙門原奏每月撥銀一千兩查戶中用款以延教習繕書籍爲大宗此外譯報及書手匠役人等工價伙食費亦不貲每月千兩只供各項之用至於購買圖籍儀器等款尙無所出原辦零星招股過於冗碎自應遵照原奏概行停止其慕義樂輸捐助鉅款者善堂書院有例可循亦應查照原奏酌核收納現在事屬初行需款數難預定惟有就現有經費次第興辦總以撙節爲充拓之基切戒濫費以收實濟一分職堂上年部院諸臣開設書局倉猝舉辦草定規模議事尙未畫一今擬將局諸物各分職掌庶心志專一可期日起有功所有在局辦事諸臣職名另單開呈 御覽一刊印信擬刻一木質關防文曰管理官書局大臣之關防凡向總理衙門領取經費及有行文事件卽以此爲憑信以上七條如蒙 俞允臣卽敬謹遵行卽從本日開辦臣竊惟同治初年總理衙門請設立同文館講求泰西諸國文字令翰詹部院各官一體入館習練維時議論紛紜人情疑阻風氣未開事因中止後雖經總理衙門設法招徠入館生徒畧有成就而讀書明理之人從事其中者絕少遂致中外間隔彼已不知倉猝應機動多舛誤近者倭人構釁創鉅痛深一二文人學士默參消息審知富強之端基乎學問講肄所積爰出人才砥礪奮興消除畛域期以洞中外之情形

保 國家於久大此與同治初年設立同文館之意實相表裏誠轉移風氣一大樞紐也。臣開辦初章事歸簡要未盡事務新圖擴充其藏書刊書游藝學堂諸所有稽查諸員考其課業綜理諸員總其綱維各期敬業樂羣尊賢尚齒善資羣議衡集眾長庶幾成材者擴會通過半之思志學者得師友觀摩之益至局中用款惟延請編譯鈔寫書籍典收文簿登記帳目及工匠製造之人發給薪水此外興辦局務輪詹科道部院諸臣皆出於誠懇之心忠勤之念但期創開風氣增廣見聞爲異日報効國家之用。臣亦鑒其初心一概不請獎叙不支薪資至印送各路電報只選擇有用者照原文鈔錄不加議論凡有關涉時政臧否人物者概不登載以符總理衙門原奏所有議立條款請 旨遵辦緣由謹繕摺具陳伏乞 皇上聖鑒訓示謹 奏

論報館有益於國事

視國之強弱則於其通塞而已血脈不通則病學術不通則陋道路不通故秦越之視肥瘠漫不相關言語不通故關粵之與中原逸若異域惟國亦然上下不通故無宣德達情之效兩舞文之吏因緣爲奸內外不通故無知己知彼之能而守舊之儒乃鼓其舌中國受侮數十年坐此爲耳
去塞求通厥道非一而報館其導端也無耳目無喉舌是曰廢疾今夫萬國並立猶

比鄰也齊州以內猶同室也比鄰之事而吾不知其乃同室所爲不相聞問則有耳目而無耳目上有所措置不能喻之民下有所苦患不能告之君則有喉舌而無喉舌其有助耳目喉舌之用而起天下之廢疾者則報館之爲也

報館於古有徵乎古者太師陳詩以觀民風飢者歌其食勞者歌其事使乘轎軒以采訪之鄉移於邑邑移於國國移於天子猶民報也公卿大夫掄揚上德論列政治皇華命使江漢紀勳斯十考室馴馬畜牧君以之告臣上以之告下猶官報也又如誦訓掌地方志以詔觀事掌道方憲以詔辟忌以知地俗外史掌四方之志達書名於四方擇人掌誦王志道國之政事以巡天下之邦國而語之凡所以宣上德通下情者非徒紀述兼有職掌故人主可坐一室而知四海士夫可誦三百而知國政三代盛強罔不由此

西人之大報也議院之言誦紀焉國用之會計紀焉人數之生死紀焉地理之險要紀焉民業之盈絀紀焉學會之程課紀焉物產之品目紀焉鄰國之舉動紀焉兵力之增減紀焉律法之改變紀焉格致之新理紀焉器藝之新製紀焉其分報也言政務者可閱官報言地理者可閱地學報言兵學者可閱水陸軍報言農務者可閱農學報言商政者可閱商會報言醫學者可閱醫報言工務者可閱工程報言格致者

可閱各種天算聲光化電專門名家之報有一學卽有一報其某學得一新義卽某報多一新聞體繁者證以圖事蹟者列爲表朝登一紙夕布萬邦是故任事者無不隔蒙昧之憂言學者得觀善濯磨之益猶恐文義太賾不能盡人而解故有婦女報有孩孺報其出報也或季報或月報或半月報或旬報或七日報或五日報或三日報或兩日報或每日報或半日報國家之保護報館如鳥驚士民之嗜閱報章如蛾附羶閱報愈多者其人愈智報館愈多者其國愈強曰惟通之故

其益於國事如此故懷才抱德之士有昨爲主筆而今作執政者亦有朝罷樞府而夕進報館者其主張國是每與政府通聲氣如俄土之爭戰德奧意之聯盟五洲之人莫不仰首企足以觀泰晤士之議論文甫脫稿電已飛馳其重之又如此然而英國德國日本國或於報館有譏謗之律有懲罰之條則又何也記載瑣故采訪異聞非齊東之呶言卽秘辛之雜事閉門而造信口以談無補時艱徒傷風化其弊一也軍事敵情載不實僅憑市虎之口罔懲夕雞之嫌甚乃揣摩衆情臆造詭說海外已成劫燼紙上猶登提書發惑聽聞貽誤大局其弊二也臧否人物論列近事毀譽憑其恩怨筆舌甚於刀兵或颺頌權貴爲曳裾之階梯或指斥富豪作苞苴之左券行同無賴義乖祥言其弊三也操觚發論匪有本原蹈襲陳言翻覆塗說或乃才盡

爲憂敷衍塞責討論敷衍聞紀述游覽義無足取言之無文其弊四也或有譯錄稍廣
言論足觀刪汰穢蕪頗知體要而借闢宗風不出鄭志雖有斷章取義之益未免歇
詩不類之憾其弊五也具此諸端斯義遂殆遂使海內一二自好之士反視報館爲
蠹賊日報章爲詆言古義不行良法致敝嗚呼不其恫歎

今設報於中國而欲復西人之大觀其勢則不能也西國議院議定一事布之於衆
令報館人入院珥筆而錄之中國則諱莫如深樞府舉動真相不知無論外人也西
國人數物產民業商冊日有記注展卷粲然錄副印報與衆共悉中國則夫家六畜
未有專司州縣親民於其所轄民物產業末田周知無論朝廷也西人格致製造專
門之業官立學校士立學會講求觀摩新法日出故亟登報章先覩爲快中國則稍
講此學之人已如鳳毛麟角安有專精其業神明其法而出新製也坐此數故則西
報之長皆非吾之所能有也然則報之例當如何曰廣譯五洲近事則閱者知全地
大局與其強盛弱亡之故而不至夜郎自大坐竹井以議天地矣詳錄各省新政則
閱者知新法之實有利益及任事人之艱難經畫與其宗旨所在而阻撓者或希矣
博搜交涉要案則閱者知國體不立受人慢辱律法不講爲人愚弄可以奮厲新學
思洗前恥矣旁載政治學藝要書則閱者知一切實學源流門徑與其日新月異之

迹而不至抱八股八韻考據詞章之學枵然而自大矣準此行之待以歲月風氣漸開百廢漸舉國體漸立人才漸出十年以後而報館之規模亦可以漸備矣嗟夫中國邸報興於西報未行以前然歷數百年未一推廣商岸摩闢踵事滋多勸百諷一裨補蓋寡橫流益急晦盲依然喉舌不通病及心腹雖蠶蝨之力無取負山而精禽之心未忘填海上循不非大夫之義下附庶人市諫之條私懷救火弗趨之愚迫爲大聲疾呼之舉見知見罪悉愆當途若聽者不亮目爲誹言摧萌拉蘖其何有焉或亦同舟共艱念厥孤憤提倡保護以成區區則顧亭林所謂天下興亡匹夫之賤與有責焉已耳

報館

天生民而立之君君者羣也所以爲民也然而分隔勢聯堂高廉遠古人於是有諫鼓謗木之制有采風問俗之官惟恐下情不得上聞上澤不能下究所以防壅蔽而恤痼疾者如此其汲汲也秦以武功吞併六國變封建而爲郡縣舞文法以馭臣民燔棄詩書愚我黔首偶語者棄市腹誅者有誅暴戾恣睢及二世而土崩瓦解後世人主沿襲餘波雖苛政漸除而輿情終抑唐宋以下給諫侍御言路亦有專官然而風影傳聞結接樹黨問問之疾苦安得遽登臺省之章疏也況乎忌諱猥多刑戮不免所謂言者無罪聞者足戒昔有其語今無其事蓋暴秦之爲禍烈矣本朝

聖神相繼愛民納諫不乖言言取順順雖高不諱之風草野尙有難通之隱積重之勢未易遽同也泰西報館之設其國初亦禁之後見其公是公非實足達君民之隔閡遂聽其開設以廣見聞迄今數十年風氣日開功效日著製一精器登報以速流傳而工作興矣立一公司入報以招資易而商達爾矣與國之政令朝夕可通而敵情得矣刑司之讞辭纖毫必具而公道彰矣耳目所經聰明益濬至於探一新地行一新政見一新理得一新聞皆可與天下之人同參共證所謂不出戶庭而周知天下之事者非報館無由也比年各省水旱偏災重賴日報風行有以感發善心集捐鉅款明效大驗已如斯矣惟各國報館雖多均其國人自設法國並派員查閱以示限制中國於己民則禁之於他國則聽之偶礮兵端難免不曲直混淆炎威視聽甚非所以尊國體而絕亂原也似宜曉諭民間准其自設資本不足官助其成偶值開釁之時必派專員稽察主筆者公明諒直三年無過地方官吏據實保薦予以出身其或顛倒是非不知自愛亦宜檄令易人一切均仿泰西報館章程辦理至西人報館宜與各使妥議毋許再出華字報章否則按月繳捐仍須派人查閱此事不該通商之約本屬中國自主之權各國當亦無詞以拒也論者輒以前此日報郵爽中國痛絕其事並深惡其人而不知樂大吹堯各爲其上國之利器不可假人今報紙之流行廣矣華人知日報之益者多矣一轉移間則諸利皆興而諸弊皆去集思益廣四民之智識交開殫見博聞萬里之形聲不隔高掌遠跡明目達聰修益地之圖補職方之志此亦大一統之先聲嚆矢也而顧可忽視

觀泰晤士報館記

國民新報主筆某君云余携英國駐日本公使文書詣泰晤士館嘗督其實情矣該館總理弟華兒打氏爲印行局長氏示余曰距今百十年前所刊泰晤士報第一號乃同氏曾祖父發行之物氏告余以開印各般論說更薦一曉暢報事者爲余詳言植字植板鑄字紙式鉛式器械補繕製作校正印刷發行等法且逐一仔細覽觀焉如植字器械精巧簡便雖拙手技者容易辦事印刷器械購置兩個一足故總理華兒打氏所發明屬輪轉機一點鐘能刷印一萬三千張一爲美國何抹公司所製一次能印刷六十四頁植字者多用壯年植板者多用幼年合館員四百二十人問在館中從事報務者幾何年曰三十五年於茲今已六十五歲余乃重問曰君能知使奉晤士報重於天下之的令氏乎老館人喟然曰固知之彼真傑士也然今則亡矣越日余更詢以撰述之事曰尙有服報館務五十年者焉三十五年故不足爲珍也嗚呼余知之矣泰晤士館所以隆盛而見重於天下者豈爲如斯乎雖然觀該館印刷工人其執事實情不甚推服若論彼慧敏巧捷則日本技工洵駕其上唯在喧雜紛擾之間冷然沈然各服其業蒸汽機關及滑車槌擊擗擦之響驟焉不聞其聲

斯業者如坐深山幽谷之裏是豈該館人之美風乎抑亦英國工人之美風也噫彼克龍尾兒尾兒通之徒此二人皆英國素有名望者故論及之雖年湮代遠乎抑其血滴猶分流於工人血管中也

鄂督張飭行全省官銷時務報札

爲札飭事照得新報一項有裨時政有裨學術爲留心經世者必不可少之編百餘年來泰西各國推廣不遺餘力如英之泰晤士報法之勒當報德之科隆尼司報其尤著者也每日所出各數十萬張其他各地有各地之報各業有各業之報各學有各學之報英國報館幾二千所可謂盛矣二十年來中國亦漸通行但其始皆出自洋商牟利故于事之是非虛實不免失真且所錄多齷齪說無關宏遠宜爲士大夫所不屑道比來內外臣工頗有奏請設立報館者本月准總理衙門咨行議准刑部侍郎李條陳摺內亦有選譯西報一條奉旨允准可見報館有益大局實非淺鮮查上海新設時務報館每一旬出報一本本部堂披閱之下具見該報識見正大議論切要足以增廣見聞激發志氣凡所采錄皆係有關宏綱無取瑣聞所采外洋各報皆係就本外譯出不比坊間各報訛傳臆造且係中國紳宦主持不假外人實爲中國創始第一種有益之報湖北地據上游交涉日繁他日又爲築造鐵路所

自始只在官員士庶于時務一門固不乏留心探討之人第恐聞見稍隘欲擴末由則時務報裨益實多現已飭知時務報館所有湖北全省文武大小各衙門文職至各州縣各學止武職至實缺都司止每衙門俱行按期寄送一本各局各書院各學堂分別多寡分送共計二百八十八分每分每月二本每分每年報價照該報館章程先期兌付之價計銀元四元總計每年報價一千一百五十二元本年以半年計算應付銀元五百七十六元自應即日付給飭令速寄以後按年於正月初預付統由善後局在於間款項下彙總支發即交漢口電報局轉寄上海該報館查收取具收據存查無庸向各衙門及各局書院學堂收取報費以期簡速應自該報館開館第一次所出之報第一冊起概行印送足數至如何寄送報本由該報館自行設法毋庸官爲經理公行札飭札到該局即便遵照辦理具報毋違

論商務報緣起之故

衡州唐 撰撰

方今中國之所提要以圖者豈有他哉不外乎富強而已矣人第知立國之道真要乎自強而不知自強之基莫先乎富國夫觀其朝則頭會異斂而爲補直行其野則皆歐媮生而亡積聚加以虎狼之鄉伺於外蠢賊之民訂於內則雖才如管樂智如孫吳勇如黃齊辯如蘇張而亦必從而束手從而寒心是故重九府之書成而齊威以霸務財訓慶之政舉而衛文以興自古未有不務富其國而遽能自強者也故

中國而不欲自強也則已中國而欲自強乎其要必自富國始

富國之道有二曰導源曰節流導源爲要而節流次之所謂源者何在曰商務而已矣夫我中國非無源也不知所以爲商也無學以教商則商民拙無會以聯商則商情睽無帑以助商則商志惰無兵以護商則商途梗無政以令商則商道乖才甯惟是又從而卑之抑之迫促而箝制之苛虐而剝削之噫抑何待商之薄而責商之厚哉夫烏知歐洲諸邦與夫目前之日本皆恃有商務以爲始基而始日臻乎強盛哉苟能導其源而節其流胥天下而達於商務治國其如運於掌乎

然而富國者商也而不僅商也智敏巧述以應夫商之求者則有工耕九餘三以給夫商之食者則有農農而食之工而成之商而通之三者舍一而不可不能善其事利其器則求之者靡應之者緩有工如無工也不能物土宜盡地力則食之者衆生之者寡有農如無農也無工無農而商何以立中國自農家者流絕而樹藝播種之法失其傳考工之記亡而飭材成器之官曠其職故自二千餘年以來民皆窳其智蔽其聰舉凡農工商三者皆聽民之自爲盈虛消長於其間而不之問洎乎中外通商大開海禁見聞所逮耳目一新然後進而驗其所以然之故而後知各國之所以自強者在商務又不知其製造何以若斯之巧也繼而始悉其所專精者在工務又不知其物產何以若斯之饒也繼乃始悟其所致力者在農務於是乎中國環視而起思爲亦步亦趨之計而擇焉不精語焉不詳雖通商條約載有利益均霑之語而中國則僅蒙其言未享其利第見爲損不見爲益坐使他國之人攘吾之財莫知紀極明知利權之外溢

而無術以挽回之然則至今日而始談商務而并計及乎農工之務是猶見兔而顧犬亡羊而補牢也不亦晚乎然而至今日而亟談商務而并不忍乎農工之務是則尙能顧犬尙能補牢雖晚而猶未晚也聞實稿計乎中國之大局而惕然懼也中國自咸豐八年與英法俄美四國在上海議定通商換約而後合計通商之埠凡七省又住長江增設三口自中東印俄既成又增安慶沙市杭州蘇州等通商碼頭于是各省要埠皆爲洋商所據而中國無自占之商埠矣英於當時條約又載有準其持照往內地商游歷通商悉聽其便一款于是有自赴各省山鄉市鎮采辦貨物爲有司所不能禁者加以許雇內地船隻販運往來是則舟車所至皆可施其飲羊登龍之計利之所在恣其挹注而華商貿易之途隘矣四國換約而後小國效尤者踵至如葡萄牙西班牙意大利之屬前此王會之圖所不載職方之紀所未詳者均闌入內地收我利權而漏卮之入於外洋者巨矣四國換約而後俄羅斯乃割黑龍江以北之地五千里以罷兵其中五金煤鐵之礦不可勝計而北陲之利半入於俄矣自洋藥入內地銷售至十餘萬箱之多爲值以萬萬計而氓庶之脂膏竭矣米穀巨石銅錢何例不準出口自長江各口許英人設埠一切弛禁以至米穀湖廣民食維艱於是乎人無隔宿之儲戶有罄懸之歎矣錢幣既弛錢皆捆載出洋以藥水提取金銀仍以銅鉛轉售中國至使比年以來制錢奇絀私鑄滋多而國家之圖法壞矣洋人以貨易銀歸國其貨之購自華商者皆以大小銀元銀元中雜以銅質刻雖自行鼓鑄而前此所耗已多是中國之銀根短矣銷備白鉛軍械等何例不準入口自弛禁後皆明目張膽列肆分銷甚至窩藏船隻悉購自外國各

廠而中國採辦軍需之銀又半輸之外洋矣俄人新產之茶日眾歐洲釐桑之利日饒中國絲茶兩項日見滯銷而華商之生計感矣自英人建破廣州議償兵費商人各項至二千一百萬多法人安南之役亦償其兵費連中東議和竟償兵費至三百兆目下國債遂增至四百餘兆于是正供雜稅之入不足以償國債之息而度支益形其絀矣自海軍盡沒於倭而般隻軍械礮臺又將籌款經營而羅雀掘鼠之計窮矣欽差公使絡驛出洋糜費以鉅萬計而無益之損失多矣洋人竭澤而漁中國傾囊而奉先時所願無望珠還後此取求未堪囊罄詩曰池之竭矣不云百涸泉之竭矣不云自中蓋中國公私交困未有甚於今日者也

況乎中國今日之人口不下四百兆其散處於外洋者已有數千兆以逮年之生意計之每口百兆除與物故者兩紙約宜增口三四兆統計每年約增口十數兆并以後十年而計之中國人口宜加至五百餘兆使不思患預防而無食以養之無業以授之無術以全之則舍民而外雖欲求為游惰而不可得計世有散而至於四方已而惟有相率而為寇盜已耳後日中國不將以人滿為憂哉抑知有人此有土有土此有財聖人之言萬世不易誠使自今以後能振作一切商務於內則特設商務大臣為之綱維主張以握其要然後設商學立商會為之借貨津貼以籌集商之資本為之鐵路輪舟以通夫商之往來為之兵船戰艦以衛夫商之行李為之禁台條教以弭夫商之詐虞而又參之以電學化學光學汽學及機器測量天文輿地諸學以啓士之智而代其勞廣農之利而倍其入務期地無遺利民有餘力則過此以往

一二十年微特內地比戶可封即散處外洋之民亦以家給人足由富而強向之寄居該處者勢且基於盤踞有此五百餘兆之眾不虞飢寒而後選其材技以備折衝而又有散處他國之民為之聲援則舉地球之上所有諸國吾決其可折衝使之內無腹心肘腋之慮外有席捲囊括之勢自強之謀其要乎此商務顧可忽乎哉

乃今之倣西法而設報館者味乎當務之急也務為騰說信口雌黃作為大言炎炎聚訟論時談說朝政言 國之隱情傳陰私犯諸不韙以計為真啓人觀觀潛召外侮多魚漏師甘昭召敵以茲相例殆有甚焉其或據拾新聞空乏傳會傳資談柄無裨國事如斯之倫未易悉數本館主人憫時事之孔棘念民力之彫敝懷曲突徙薪之意慮未雨綢繆之思竊念地球上所有諸國其土地之膏腴礦藏之豐厚物產之富饒戶口之蕃庶無可與中國比者雖際積弱盡足自強又見 國事艱途鐵路設郵政力開風氣以收利權而一一封疆長吏亦駭駭乎設商局立商會知商務為當今切要之圖籌畫經營不遺餘力特恐天下之大商民見聞有限一切良法美意雖西人制作之精無由觀瞻爰特設商務報凡屬中外商務日出而不窮者周諮博訪備列報章聞或附陳官員參以論說效其一得之愚以俟芻蕘之採將來中國商務蒸蒸日上是為儲釜之助者在本報更有微勞亦未可知浸假自此而後不旋踵間而中國竟得由弱而強由富而強也則天下幸甚本館幸甚

時務分類文編卷三十二

驛傳

天下之土地由狹而廣也邦國由分而合也事變由少而多也古之時王畿千里區以五服別以九州各子其民各君其國自爲風氣不相往來秦併諸侯漢開邊境自是而後土宇日闢生齒日蕃世變日紛則驛傳日重置郵傳命達意通情無君民上下皆欲之皆需之此自然之理也中國置驛設臺專遞公文不遺私信經費既鉅流弊孔多道路稽延人馬瘠弊及軍情瞬息警報紛紜雖有官司仍虞曠誤各省會及沿海要地多增設文報局以捷信音商民遠適他方聲聞睽隔難者勅立信局用便旅人各口輪船既通推行日廣然辦理一切官不過問故劫掠逃閉之事時有所聞且陸路收資爲數過鉅國家歲費帑金百萬而膏澤不逮於民分道揚鑣上下交病已大非君民一體之盛心矣況信局惟利是圖耳目見聞有所不及遂有土匪伏莽逆書秘信任意飛傳而塘報遷延乃反體乎其後疏虞之慮何可勝言今泰西諸邦均設立書信館公文私信一律通傳酌收微費以資津帖不惟設驛之費轉乎有餘而積少成多遂爲每歲大宗之入款官私利便消息靈通既易稽查永無遺誤利民利國二者兼之矣惟聞近日總稅務司有延訂西人代爲經理之說無論民情疑怪易滋事端而履霜堅冰尤不可不防其漸蓋天下之事譬諸一身土地猶肌肉也財貨猶膏血也而驛傳四達則脈絡之所流行也沿海稅關既以相授而聲息之榮

鎗復舉而昇諸異國之人則天下大權咸歸掌握即英人不食土地設彼自爲操弄何以禦之此存亡禍福之機絨必不可輕心以掉者也竊謂西人決不能用而西法必應仿行實成出使諸臣將各國書信館章程詳加繕釋參酌舊制議立新章以現在驛站塘汛爲之基而各省鎮埠鄉村均設分局量收信費酌派實員縝析條分實心經理稍有私弊立予撤參每歲所收專款報部仍由各省臬司查辦現有信局飭令閉歇仍將夫役人等收入官局俾得駕輕就熟且免失業爲匪民間寄信之資統照信局酌減一半刊刷憑紙無論何處均可計日飛達以便閩閩仍與電報局聯爲一氣中國地大物博商旅繁多通一歲計之所入當不下二三千萬而官報之往來愈捷民用之節省已多夫恐句通預籌防範窮民奔走益廣生機惟一二壅斷之信局商人稍失重利然利多害少取信商民言籌餉於今茲計無便於此者獨是國之利器不可限人苟以赫德爲之則其害亦反是臺釐千里移步換形所望於彼已之間熟思審處毋倚其小忠小信而自貽後患於無窮也

郵政

國家有大利焉其事至簡至便而其利又至鉅則莫如仿行泰西之郵政上年臺灣撫臣劉行之於臺北矣願室廢而卒不行者未奉明文未籌全局行之之心不精也行之之力不果也非郵政之不可行也乾隆初年德人變通各步信局之法初爲郵政官民兩利於是各國羣起而踵其後日本明治二年亦仿爲之皆迄於今益盛光

緒六年三月西報論日本改從西制略嫌遲驟所能責效於目前者唯郵政一宗我國家長駕遠馭發憤自雄凡製造電報開采輪船鐵路各事宜或行之而大收其效或行之而始引其端曾不以爲權輿泰西不屑規隨獨於郵政願墨守成說終無端倪反出日本下將無風氣之關係天時開世運非盡人事所可強耶或謂郵政之行有四難二不可驛站之難撤也信局之難停也輪船之難遠外洋也各國之難守郵約也且成本太鉅必廢半涂不可行者一錐刀是競恐傷

國體不可行者二噫此一孔之見苟徹始終籌之將因四難而爲四利無所謂二不可且有不可不行者二是豈容泥毛髮之小害而竟置邱山之大利哉非不知明季因裁驛站釀成流寇之既乾隆時賀逢龍亦構衅於湖北今不遽因郵政而裁驛站且先藉驛站以輔郵政星軺節傳之往來仍惟驛站是賴郵政專遞文報專帶信函遇郵政舟楫所不達者勢不便另備夫馬仍由驛站加驛遞送歲終酌提信費以爲津貼是驛站必踴躍從之俟規模大定信利充裕將驛站所設夫馬歸併郵政而會典所載歲三百餘十萬之支銷可無再費矣利一信局雖民間私設而所在多有以一局上下四五人計之天下衣被於信局者何啻數萬人驟奪生業沮挽必在意中今宜於將行未行之先

取戾者信局於旱道每用夫而無馬內河水道江浙爲多則用腳槳小船日不過百里唯江海各步近亦多坵輪船今郵政於旱道坵驛站排日緊遞於內河僱用小輪專送糧餉確確檣檣以敏其信局須而月或旬始遞到者寄從郵政已可得有恩音人情莫不喜速而惡鈍信貨雖較信局稍昂大都棄彼就此沉酌中定議既速且廉卽江海同坵輪遞專恃此項信局已無以自立將不令其停而自不得不停若示以體恤不妨准其增入股分或其本不足一股准其數局併計各局所用之人俱與本多之股東或股實紳商切爲保薦酌予留用既資熟手亦免向隅更得一說屬城鄉鎮集往往一局而分設數處一處而分設多局如甲設一局於上海則乙丙丁各分設於各城鎮市集同一牌號互相接送今郵政可仿其意仍就信局以爲局合而爲一有願包設者令歲認繳所餘若干總之分則利微台則利巨信局且不必盡行撤去利二泰西郵政均設有公司輪船信箱不到則株守以待誠重之也中國內地輪船雖已通行而既興郵政不能不兼帶外洋若特設公司輪船目前萬萬無此財力法宜就各國公司之船先與訂定日期言明水腳託以代帶合同既立便可無慮浮沈利三就上海一隅言之英美法日本均有書信館查光緒七年日本修約某國

將開在日本之郵政局一體裁撤中國誠辦行郵政即可接日本所約以請之所有書信館房屋等項歸併中國估給成本其司事人等如願爲我用亦須有安人保薦與信局人同書信自外洋來者中國郵政局爲之分送自中國去者各國郵政局爲之分送互相爲用各不給值外洋見行郵約如此咸豐八年十年俄約光緒十二年法約均有兩國公文信件互相遞送之文交易而退利四如慮成本太鉅則事可由電局兼辦郵政事體大不設官置局不足新耳目而資統率多設官置局則所費不啻幸中國電報二十三行省業將四通八達賁之兼辦郵政不特經費既煩呼應亦屬何不可行如慮錐刀是競彼宋行青苗明行加賦袁世批政原不足以例我朝然因軍餉而權釐因河工而捐納遂致商民腹誅仕途隳壞其實有害於國體者尙不得已而行之郵政所害者獨信局及上海之書信館亦既准附股予酌留給成本矣毅然決然何嫌何疑收回其權積少成多歲入大宗遇有要需把注不竭釐捐所入亦巨固不能概予芟除捐納歲復有限儘可立即罷去所全於國體者更大何不可行光緒九年法人不法以越南之釐先以兵船游弋南洋各海口嘗試我堅壁時坐中國郵政未興法人書信皆可由其館遞寄其國以取進止中國不知阻絕亦未由阻絕若先已收回各國書信館自興郵政法人即無從遞信兵機之遲速關中

外之勝敗利權猶其小焉者也此不可不行者一中國會匪教黨遺勇馬賊伏莽多有難保無私函往來一經官局庶幾有所疑畏而彼此不便函商藉強內患於未形此不可不行者二然則何樂而不行何憚而不行查同治十二年英國信局綜計利銀五百二十萬八千九百二十二磅除局費二百七十五萬四千七百六十四萬磅淨餘利銀二百四十五萬四千一百五十八磅中國銀數以一千萬兩計二十年來更溢其替泰西向唯美國各官遞函不由信局鈐印輪資自此年始亦議援例照辦中國官電報多以私報假託郵政徧行不如官商一體輪資以免影射廣土眾民所得必甲於五大洲按泰西由官鑄印人頭紙而信之諸信館改照郵法辦印時強亦取售紙之祖然雖見在先以電局為根本將來必與鐵路相表裏鐵路未成可神建路之需鐵路既成可作養路之費當軸而有意富強也願勿為清議所劫持勿為成見所膠執迅速舉行中外方拭目而樂觀厥成矣

奏辦郵政

戶部 奏為遵 旨議辦郵政請由海關稅設郵遞推廣並與各國聯會以便商民而收利權恭摺仰祈 聖鑒事竊臣衙門准署南洋大臣張之洞咨抄擬請設立郵政請飭議章程一片光緒二十一年十二月初三日欽奉電傳 諭旨郵政一節業經總署核議粗有頭緒矣欽此欽遵仰見 聖主周卹商旅通志類

情之至意查原奏內稱泰西各國郵政重開鐵路特設大臣綜理取資甚微獲利甚鉅權有統一商民並利
近來英法美德日本在上海及各口設局實背萬國通例曾經前南洋大臣曾國荃據道員薛福成委員李
圭稅務司葛顯禮等往復條議咨由總理衙門飭總稅務司赫德詳議謂此舉裕國便民為辦得到之事而
稅關所辦郵遞因與國家所設體制不同故推廣每多窒碍現復與葛顯禮面加籌議知其情形熟悉各國
稅務司熟諳辦法者當亦不乏請 飭總理衙門轉飭赫德妥議章程開辦即推行沿江沿海各省及內地
水陸各路務令各國將所設信局全撤並與各國聯會彼此傳遞文函等需臣等查光緒二年間赫德國
議滇案請設送信官局為郵政發端之始經臣衙門函商北洋大臣李鴻章於四年間覆稱擬開股京滬
天津烟台牛莊上海五處畧仿泰西郵政辦法交赫德管理嗣因各國紛紛在上海暨各口設立郵局咸
佔華民生計九年間德國使臣巴蘭德來請派員赴會十一年曾國荃咨稱州同李圭條陳郵政利益各
節並據寰海關稅務司葛顯禮申稱香港英監督有願將上海英局改歸華關自辦之語經臣衙門先後
飭據江海關道總稅務司籌議咨行南北洋大臣查核十六年三月劄行赫德以所擬辦法既於民局無
損即就通商各口推廣辦理俟辦有規模再行請 旨定設此該大臣張之洞所稱各稅關試辦郵遞
之權與也臣等復查寧海江海各關道來稟每謂稅關郵局未經奏定外人得以藉口十八年冬赫德亦
以數年來創辦艱難若再不奏請設立官郵政局恐將另生枝節十九年五月迭 接李鴻章劉坤一咨據
江海關道番緝梁鼎稱上海英美工部局現議增設各口信局異日中國再議准辦必更艱難各等語是

原奏所稱體制不同 推廣每處窒礙 誠爲洞見發結之論 至各國通行 歲收鉅帑 一節 考察兩郵政自乾隆初年 普國始議代民經理 統以大 臣位 齊卿貳各國以爲上下交使 仿而效之 光緒十九年 萬國呈送萬國郵政條例 聯約者六十餘國 大端以先購圖 記紙 粘貼 信面 送局 以抵信資 其費每封口 信重五錢者 取銀四分 道遠酌加 其取資既微 又有定期而 運拆百貨 騰跌萬里 起居隨時 徑達 至有事時 儘可查禁 敵國私函 誠如原奏所稱 權有統一 爲利商利民 卽以利國之要政也 又查十八年以來 英國一國郵局 清單一歲所收 銀兩至六十四兆 二十萬九千四百九十圓之多 張之洞所舉 英國收數 當華銀三四十萬兩 尙係約略之辭 利伴鐵路 誠爲不虛 且西國郵政 與電局 相輔以火車輪船 爲遞送 近年法國設立公司 輪船十艘 通名曰信船 遇口停泊 信包未到 不得開碇 其鄭重如此 中國工商 旅居新舊 金山檀香山 新嘉坡 檳榔嶼 古巴 秘魯 者不下數百萬人 據李圭標稱 該工等有一紙家書 十年不達者 錄郵會有扣阻 無細國文函之例也 中國郵政 若行卽以獲資 置備輪船 出洋 藉遞信 以流通商貨 其挽回利權 所關尤鉅 臣等博訪周諮 知爲當務之急 爰於十九年 劄飭赫德 詳加討論 是否確於小民生計 無碍 上年六月 至十二月 復與該總稅務司 面商 屢先後 據其遞到四項 章程 計四十四款 臣等詳加披閱 大致 厘然自應 及時開辦 應請 旨 勅下 臣衙門 轉飭 總稅務司 赫德 專司其事 仍由 臣衙門 總其成略 如各口 新開 規制 卽照 赫德 現擬 章程 定期 開辦 應製 單紙 亦由 赫德 一手 經理 遇有 應行 酌改 增添之處 隨時 呈由 臣衙門 核定 務期 有利 無弊 至 赫德 呈內 稱 萬國 聯約 郵政 公會 係在 瑞士 國 應 備 照 會

寄由出使大臣轉交該國執政大臣爲人會之擴自可援萬國通例轉告各國將在華所設信局一律
回數或豐八年俄約光緒十三年法約本載明兩國公文信件互相遞送中國既經入會各國無從藉口
以上所議如蒙 俞允卽由臣衙門欵遞分別咨照劑飭辦理俟辦有頭緒卽推行內地水陸各路郵期
與辦一面各行沿江沿海及內地各省將軍督撫知照屆期卽將酌要辦法飭地方州縣曉諭商民咸知
利便凡有民局仍舊開設不奪小民之利前准赴官局報明領單照章幫同遞送期與各電局相爲表裏
其江海輪船及將來鐵路所通處所應如何交寄文信由該總稅務司與各該局員會商辦理官郵政局
歲入撥開支欸自由總稅務司按結申報臣衙門彙核奏報所有遵議推廣海關郵遞開設官局並與各
國聯會各條由理合專摺具陳勅德所擬章程數欸另具清單恭呈 御覽伏乞 皇上聖鑒訓示謹
奏光緒二十二年二月初七日奉

章程四項下卷續刊

泰西設立郵政之本意務在便民非與民爭利也而官中文牘往還亦卽由之而達是爲便民卽優者
之一端至於民間之消息既通且通全國無隔閡之虞重以商賈周知市道徵賤徵貴貿易日盛郵賦
稅日增民富而君無不足之宏謨於焉斯寄郵政之利實未易優指以稽若莖莖焉以收單信資爲富
國之一助無論其微有限且英美等國常不使郵部專司郵政特立一節
國家之政務可原也有成兆累億之盈餘往往今年收信
較多獲利較厚明年卽廉其寄信之資今已減至極廉地位民間閱郵部清單猶有求重行減少者中
國創行伊始或致有所虧折而小損於一端大益於萬事隆隆日上操券可致既錄原疏附實徵會若

論其利弊有欲將學舍所擇之泰西新史儘要在

郵政

中國自胡海禁與各邦通商互市廣注起來已數十年於茲矣凡事取其所長補我所短於國計民生有裨者非次第舉行惟書信館尙屬缺如以當推廣及之者也夫朝廷之詔曰臣工之章奏文武之昭會咨稟覈案之案件關移凡有涉於政事者無不开諸公牘要件則用馬遞常事仍由驛站如慮時稽道阻又復專弁飛賁故古者既設行人之官復置郵傳之驛皆所以布德音集眾議達下情為至商旅工役人等出謀衣食欲報平安或飛信以達價值或具函以匯款項雖由各信局分別寄交每有浮沉無從追究近來通商各口信局附由輪船已較佳時便捷狹僅能施於輪船所到之處若關河阻隔則驛使難逢且華人寄迹外洋如新舊金山星架波東南洋各島中外隔絕病苦難知使中國亦仿照西法遍設書信館雖萬里如在一堂何致受人欺凌情難自達哉按泰西各國其前亦如中華設站專送公文不寄私信迨乾隆年間上下院會議謂此法止便於國未便於民因於中國城埠鎮鄉凡商民聚集之區遍設書信館統以大臣派員經理凡公文私信莫不通傳罔有歧視近日上海復設工部局總理其事日本亦仿而行之其經費所從即出自商民之信資而公

文往來資以津貼每年除支繳外所餘巨款悉歸國用而商民私信無論遠近隨時往返從無失悞取資極廉其利國便民也如此或謂明李嘗因裁撤驛站致滋盜賊貽禍無窮若復更章前車可鑒不知其時盜賊逢起饑饉流殍而所裁驛夫又不善爲安集流亡莫撫賑卹無聞故道而從賊耳今雖仿照西法而傳遞需人此輩仍可受役公家以資熟手惟必須與泰西諸國聯合一氣乃爲緊要關繫總其利民益國經始得人若徒存中外之見作畛畷之分值今之勢爲今之人必有所不能者矣

論郵政將興

載有郵政將興一節謂訪聞中國郵政一事現已由總理衙門奏准開辦並聞將來一切章程須由總稅務司核定云云此報一傳凡屬有心事時者無不聞之而色然以喜也按泰西國法以郵政爲最重緣其所入實屬不貲足以裕夫國用故鄭重視之而爲國家所專主不同中國視爲末業一任微民各自爲之而官且置之不聞若往古則尚無此業故千里函書難於天上詩人所詠藏子魚腹擊子雁足黃犬所傳白頭所帶種種故事亦極言寄書之不易耳若目前各省地方信局班船所在多有較諸往昔已覺改觀然其中之利益徒爲齟齬小民所爭求而國家則毫無所獲國家雖亦有驛傳之官大率以各省之提刑按察使司兼之所屬之官則有提塘末秩

曰駐京提塘曰駐省提塘當衝途之州縣乃有驛卒若干各驛馬若干匹南方水路則改爲代馬船若干隻取以專遞大小各衙門之公文而於商民之私函則絕不問也其實商民之信函較諸公文其數多至千萬倍故各埠信局之開設亦復日盛一日不勝枚舉然皆一無約束漫無稽查利則甚宏害亦恒有商民雖資之而亦隱惡之况每有私拆信函盜取銀兩爭多酒力耽誤日期種種弊端層見疊出耶此所以一聞郵政之將興無不額手相慶也何也郵政之興乃效西法西法不惟專官府之文書兼重商民之函信並行不悖絕不少存歧視之心誠能一旦舉行則事權歸一章程必嚴豈惟是大便乎官府之與商民而於國家則頓增一極厚之入款恐較之地丁錢糧之數有增而無減也大抵中國之不振皆誤於腐儒之拘泥但知死守成法不復知夫變通見小識微因循玩忽若此等事則必以一言敗之曰官家豈可與小民爭利耶一言既發萬眾緘口矣殊不知君之取於民者既以相賦而諭貧民家祇半畝田官家亦必歲取以數十文怠則追抗則責微乎微矣及時催索不以爲衰何獨于信資之微末而鄙薄棄之耶况乎商民之私函一律經官發遞情同案察贖類防維亦屬得體可設專官以理此事而毋庸按察之兼權可設局於各隘而毋庸州縣之驛卒驛馬以及代馬之船與夫提塘等秩也一切章程既由總稅務司臺

定自必十分週到百般支節總稅務以司赫德君固深明大郵政而又久居中國事
事留心深知中國之情形故也說者則謂郵政既興則各省信局陡然失業情殊可
憫殊不知此利本應歸諸國家已荷歷朝深仁厚澤俾汝等坐享其利者甚久此時
遣諸朝廷亦所應爾况乎汝等開局時並無納帖繳稅情事一任隨意開張縱情獲
利及今退業抑又何詞或者郵政之中亦須用人分司其事則凡業此之輩皆當及
早呈明或願出股本以濟公用或願承此役以效馳驅因裕國用而罷民業仍竭民
力以報國家至情至理兩得其宜似亦可仰邀採納矧郵政大興用人必夥與其用
夫他項之人何如用夫本業之人本業中人用之而或不敷然後再增用他人當亦
無詞可藉而當事者問心亦可無怍耳說者又謂往年曾有試行西法稟請大憲批
准開設華洋書信館之舉上海地方亦增開局創辦乃一再試行不能持久率行中
止其故何哉實由於該局難開而他局不能閉歇依舊並行不悖是不過一埠增一
信局已耳於事何濟於郵政固毫不相關今既 奏准創行自必先令各埠各信局
一概停止不得開張以便事權歸一專利國家而一切浮議務當屏絕不台輕聽夫
此事爲中國所創行伊古以來未之或有凡一應章程所宜全用西法毋庸少參一
毫私見則舉行之後自然暢行無阻其郊立程再能於創辦之始參用西人一二名

襄理其事以期實事求事不徇私情立法實嚴杜私尤貴密結心總稅務司者必早有成竹存于胸中而不待旁人之饒舌也煌煌鉅政在乎望之矣

論宜亟興郵政之事

古者職方之掌厥有專司今則驛務之事爲提刑按察兼理所謂驛務者祇因官場辦公傳遞文牒而設所設驛站首重京差此外無甚關切從未聞有爲民間興郵政之舉者近數十年來輪船遙越電報風馳則之傳遞書郵由陸路行走今變而爲從海道住還蓋迂迴道左執若輕駕波濤之直捷自是之後莫不識陸行難而遲水行易而快也而驛站之設將亦廢弛矣况今日者電線之設棋布星羅陸則分布各省水則遠達各洲瞬則千里莫此若也是則傳書之妙當以電線爲觀止矣不知事以閱而識深物以攷而技進德律風之製又較舊線別開生面能使數百里外言語相通應對如響邇又有傳聲筒之製能使人對筒立言卷而藏之緘封遠寄無論道途遠近年月久暫一經其人發其樞機筒則能言雖色笑未親而音聲畢肖令人聽之娓娓忘倦其口吻無稍謬差洵屬出神入化矣此等妙運之物莫不稱奇而究之所值不資非盡人能購用故郵政之設不容稍緩也夫以事無大小必通音問者多藉寄書郵爲之傳遞然後能兩地通情所以黃耳寄書川魚剖素亦有家書抵萬金之

珍而中國向無郵政之設未能便民若能倡而興之樹以表率則郵政之事豈茫然不知其端倪哉第思郵政之設可爲國家收無窮之利爲閭閻施莫大之功德庫足以充盈商務因而振起非於此可以收效耶中國信局民自爲之近日幣費叢生牢不可破恒見附信之寄每有延擱而不遞至者甚有浮沉而湮滅者更有寄附珍貴之物銀兩之件被其乾沒者種種弊端不一而足既無例援以懲其罪以無專責以分其勞是以各信局得以任便肆爲而人莫之奈縱或向其理論而已被其貽誤耽延曠日彌久言之殊令人髮指也前聞赫總稅務司議准開設郵政局一節當時聞之者無不額手稱慶謂此後魚雁往來堪稱利捷而今尙未聞舉辦未悉將來能玉成否西國郵政視爲國家不可少之事業中津貼郵政之資不下十數百萬其重視郵政之意可以概見西人之所以不輕忽此事者蓋有見乎郵務所關甚重舉凡各國政治之盛衰軍情之緩急商務之興替人情之厚薄無不藉此以通消息且得以知所趨避其裨益豈淺鮮哉或者謂西國能出巨款津貼郵務中國其難備於轍而步後塵獨不思西國此項津貼之資不必另起爐竈而另籌款項卽其信力印填之項撥爲應支斯亦足矣非微無事他求且歲中郵驛分局需人協理實繁有徒國家卽無利可圖而冗員多有差之望民亦無信息閼隔之憂矣特患中國辦事有如無

終凡事非以贍狗爲通卽以鴛鴦爲擠陷致令豪傑之士羞與市儈等伍也近來朝廷勵精圖治凡有臣工當爲國家興言大利挽塞漏卮而所見者徒有三三御史糾核貪員究不足培國家之根本爲警石於苞桑弟思中國可興利者奚止此一端若表表諸公能併力以挽狂瀾所慮爲者豈徒日事奔走侯門當緣祿位而已哉

郵政上

古之時草檄飛書置郵傳命上有驛站以通文報下有使命以達書函至於邊陲關繫尤重孔道則稱臺站沿邊則曰卡倫元憲宗於瀚海中間沿途設卡後人紀其勛績乃與伐宋並稱其重且要也若此中國郵政內隸於兵部外統於臬司塘汛舖兵星羅棋布凡 朝廷之詔旨臣工之章疏本管之上下文移隔省之關提照會統謂之公牘或由馬遞或用舖司遇有軍務羽檄飛馳又必增設驛馬公家之費累萬盈千而積弊所叢時虞曠誤近各省復設文報局以捷信音至商旅工役人等過都越國偶有私信局寄艱難道路浮沈無從追究國家歲費百萬之款項養數萬之人夫設官數百員置驛數百所以爲有利於國歟而稽延貽誤時有所聞國固未嘗利也其商民之音問則奉越肥瘠漠不相關於君民一體之意久已忘之習而安之矣泰西各國向亦如中國驛站專送公文不寄私信乾隆間經德國上下院會議請此法

止便於國不便於民因於國中城鄉市鎮商民聚集之區偏設書信館統以大員派員經理凡公文私信莫不遞傳嗣後各國亦皆仿行近日英法美復於上海設局經理其事自當年用費外所入之欸歲有贏餘可知郵政一端其益甚宏其效甚速輕而易舉無耗費之虞遠而可通無滯滯之虞所謂上下均利而無所不利者也中國幅員最廣而郵政不行跬步之間遠於千里人通而我塞人速而我遲人明而我暗日皇皇然憂貧患寡而不知大利之所在即在便民便國之中也日汲汲然籌餉練兵而不知隱患之所伏即在無見無聞之內也十餘年前各國約商郵政辦法舉地球各國通爲一制彼此互傳日大小邦亦與其列以中國拘泥古製攢而棄之法京巴黎斯前歲清單核計往來書信英人約每人四十封奧人二十五瑞人三十美人二十一德荷人二十法人十七意人七西班牙人六葡人五日本人三俄人二而中國之人亦未與其列也國體所關即開外人輕侮之端以爲不及日本日本近日講求郵政逐漸擴充長崎領事余眉雲書云自丁丑年起該國郵政局總結歲收銀八十一萬三千餘元除經費七十六萬八千餘元尚餘四萬五千餘元不數年間歲收已至一百四十二萬四千餘元支銷大小官員廉俸一萬零八百餘元局員工俸及僱西人數名又津貼該國輪船公司商務公司捐助各處學校等項經費銀二百三

十四萬七千餘元外尚餘利銀七萬六千餘元可謂能自收利益者矣各國向設書信館於日本各埠今全行撤去凡西人書信均歸該局郵傳而郵政之利極毫無滲漏所有經費皆出於商民信資公文往來資以津貼每年所餘巨款悉歸國家而來往程途尅期可達商民信件資取極廉以故上下翕然同聲稱便夫制無分今古法無論中西苟有益於民有利於國者行之可也必鯁鯁然刻舟膠柱欲如太古之老死不相往來則狂列之篤言佛老之餘藩絕聖棄智剖斗折衡又豈特郵政一端而已非鯁生二孔所敢知矣

郵政下

難者曰創辦郵政必先設局合中國二十三行省計之設局之數盈千歟何從出局既林立支用紛繁安保所入不敷出乎曰無慮也美國郵政共六萬四千三百三十七所前歲清單計一年中售出印記信面等三千四百兆零四十萬六千五百七十三件收資六十四兆二十萬九千四千九十一元其利息之豐厚如此况中國幅員甚廣風氣日開信件必多即收資亦必暢旺安有不敷之慮若爲省費計則若如就現有之電局船局先行試辦益輪船電報本與郵政相輔而行西國輪電所通之處即郵政所行之處今中國輪電業已暢行倘即於局中附設郵政則事半功倍矣

難者又曰泰西各國凡郵本國信件遠近悉取二分郵至外國則五分中國如仿此而行豈能獲利曰創行郵政參酌西法可也創辦之始取資不必過廉蓋西人每與一事皆厚集資本廣事招徠並由國家提款相助初雖折耗久則贏餘今中國資本無多稍形折耗人言蜂起必將不信故信資不得不稍重者情也亦勢也似宜分路之遠近而定信資之多寡其在五百里以內者取資洋一分五釐千里之內取資二分于五百里之內取資二分五釐二千里之內取資三分其餘以次遞加開辦之初先將天下路程某處至某地若干里一一標明粘貼局門刊印成書以昭定息庶使寄信者一覽而知且杜送信工人婪索酒資之弊難者又曰驛站之設已經數百餘年所用人役無慮數十萬人皆恃此爲生活今一旦仿西法設政自應裁去驛站而此數十萬驛夫何以謀食勢必揭竿爲亂劫奪頻仍昔有明末造因裁驛站盜賊蜂起饑饉薦臻遂開流寇之禍前車之覆吁可危也噫爲此說者直因噎廢食之見不足與談經世之務者也明時所裁驛夫旣不善爲調遣又不善爲撫循故不免迫而爲亂今仿西洋公私兼辦需傳遞者更倍於前至內地論電不連之區自應仍用驛夫以資熟手惟昔則工資起扣餉口幾致無資今則新費豐盈謀生反有實濟且法宜於開辦之初將各省驛夫查明綜計若干即以現在驛站改爲郵政局驛官改爲

局員專送內地公私文報信件取資之數與海疆論電各局遠近一律以廣招徠不得任意低昂致小民不便至夫役等人留其精壯汰其老弱工率亦一律加增賞罰嚴明勿蹈從前之故轍斯可矣難者又曰近來信局愈設愈多倚此爲生者不可勝數一旦創辦郵政信局無利可圖勢必有動浮言從中作梗可奈何而不知此亦無難也開辦之時宜由地方官約齊信業董事曉以大義告以郵政一端實爲利國利民起見自某月日爲始各信局一律閉歇不得阻撓並勸各信局出資入股每年從優分給官利以示體恤其不欲入股願改圖別業者亦聽之至信局業已入股其中夥友亦不可盡使投閒令每局保送三三人以憑委用如是則情義兼盡本末皆清其各局工役人等即可收入局中以備差遣何梗之有難者又曰外洋郵政皆自公司輪船往來各國故推行日廣權利日增今中國之輪船罕能至外洋曩者和眾輪船偶至美國竟被苛待從此遂無無出洋之議雖與郵政安能奪彼利權乎曰前者泰西各國欲合五大洲之郵政聯爲一氣因中國章程不同故未商辦耳固未嘗外視中國也當與辦之先須照會各國外部大臣請將郵政定章詳細譯覆以便照章辦理隨後即設公司輪船往來外洋傳遞信件况華人旅居外洋新舊金山檀香山新加坡檳榔嶼古巴秘魯等處者不下數百萬人既有公司輪船則華人來往均

寄信件即可自託本國之船利息之豐可操左券迫行之已久土貨可自運出洋洋貨亦可自運進口是亦奪回利權之一大轉機也難者又曰西國辦理郵政於海山則有輪船於陸地則有鐵路是以傳遞迅速消息靈通今中國沿海各埠輪船通行而西北各省鐵路未達即創行郵政豈能如西國利便乎曰欲使西北各省利於遞行亦未嘗無法也當擇要途創設木路木路之法簡而易行所置木式如大方木架其車輪有兩種一爲輔輪有配搭邊式之理並令車不離其木架一爲正輪託車體之重直行於木面二者相提並輪當以輔輪爲優查輔輪乃西人善創然所創尙正輪或斷或脫則仍可藉輔輪之力而不至傾覆有時道路彎曲亦可徑行故爲郵政計宜於西北要區廣造木路況中國所產樹不甚多可飭地方官各按所轄地段採取沿路之本以資造路其便有六木路之費較鐵路省十之七八舉辦自易其便一造車修車較煤火之費亦省十之五六其便二鐵路之面日久雖可翻用不過二次若木條則可翻三二次其便三造成本路所需時日約當鐵路三分之一是時亦可省其便四車行甚隱公文信件不致遺失其便五鐵路宜直不宜曲故須開山鑿洞繞道而行若木路則彎曲亦可行可免開鑿之費其便六木路已成將來若鋪以鐵便成鐵路是木路實鐵路之先基也蓋全地大勢譬之人身土地猶肌膚也財貨猶

膏血也而文報之往返猶脈絡之貫通也不有郵政以聯之則陸步之間無殊千里
偶有際阻聲息不通延羸跛躄之夫豈足與駟騁驛驛爭強鬪捷哉亦可以愕然悟
矣

電報

夫世之至神至速修去條來者莫如電藉電以傳信則其捷也可知昔有美國之
士好學深思精於格致得引電之法以利世用此電線之所由助焉之泰西各邦皆
設電報無論隔山阻海頃刻連音誠啟古今未有之奇洩造化莫名之秘如有兩國
構邊藉電報以傳遞軍機則有者多勝而無者多敗商賈貿易藉電報以通達市價
則無者常絀而有者常贏強富之功基於此矣即以英國而論其電報設於王家商
民欲通電報者須繳工費每年所入除電線局開銷之外餘充國用至本國有軍機
密事分文不費其利豈不溥哉然此猶言承平時耳若兩國交戰出奇制勝則電報
更為要圖昔年普法構兵普人於行軍之處俱設電線而法人所設之電線悉滿普
人所毀是以法敗而普勝也夫中國建邦北方至極南之地相距萬里其地多距數
千里燃烽置戍僅能告警而弗克通言通卒傳號輾轉間關多遲悞即今沿海要
害有礮臺而無戰船則礮臺亦孤立無援有戰船而無電報則戰船亦應援莫及若

敵人偵知我戰船之所在合兵圍擊無電線以通傳各省何能倍道來援一船有大費故不貸而各處有爲之毒氣查津沽爲水道入京門戶宜先由海底建一電線通兩江吳淞等處由是而閩浙粵東凡屬海疆悉

勅下大吏揆度地勢次第舉行則

宸居雖遙儼如咫尺矣或謂設立電報誠有益處然經費過鉅恐不易籌奈何余曰安設電報之處在海底則難其價煩重在地面較易其價猶輕明知創始維艱而大局攸關上下實沾其利前者傳報電信橋用外國字樣必待繙譯而知今輯有電報新書改用華文較前更便如傳秘密要事即經理電線者尚且不知何況他人既無漏泄之虞有無延擱之弊今西人更創有麥釐風一種傳音更異尋常若中國毅然舉行推廣其用更與商民傳信酌收工費則一二年間必能填還創設欸項嗣後所入源源不絕利賴無窮誠國益便民之要務也夫輪船槍炮等物中國用之有年損益猶爲參半至電報則有益無損矣何不舉而試之